

義 衢 經 又 經 中 經

福建莆田广化寺印

佛祖开示念佛

弥陀经言。闻说阿弥陀佛。执持名号。一心不乱。其人命终。阿弥陀佛。现在其前。即得往生极乐国土。

无量寿佛经言。至心念佛一声。灭八十亿劫生死重罪。

无量寿经言。一向专念阿弥陀佛。愿生彼国。即得往生七宝华中。住不退转。

文殊般若经言。系心一佛。专持名字。念念相续。即是念中得见过去现在诸佛。

楞严经言。若众生心。忆佛念佛。现前当来。必定见佛。不假方便。自得心开。

大本弥陀经言。念佛之人。有四十里光明烛身。魔不能犯。

宝积经言。他方众生。闻阿弥陀佛如来名。乃至能发一念净信。欢喜爱乐。所有善根。回向愿生彼国者。随愿往生。得不退转。直至成佛。

随愿往生经言。普广菩萨白佛言。何故经中赞叹阿弥陀佛刹。七宝诸树。宫殿楼阁。诸愿生者。皆悉随彼所欲。应念而至。佛告普广。汝不解我意。娑婆世界。人多贪浊。信向者少。习邪者多。不信正法。不能专一。令诸众生专心有在。是故赞叹彼佛国土。悉随彼愿。无不获果。

目连所问经言。我说无量寿国。易往易取。而人不能修行往生。反事九十六邪道。我说是人。名无眼人。名无耳人。

十往生经言。若有众生念阿弥陀佛。愿往生者。彼佛即遣二十五菩萨。拥护行者。一切时。一切处。不令恶鬼恶神。得其便也。

智度论言。有诸众生。谤般若。堕恶道。虽修餘行。不能得出。后遇知识。教行念佛。方得解脱。

永明寿禅师言。有禅无净土。十人九差路。阴境若现前。瞥尔随他去。无禅有净土。万修万人去。但得见弥陀。何愁不开悟。

古德言。若人以四天下七宝供佛。其福甚多。不如劝人念一声佛。其福胜彼。

云栖大师劝修净土

观佛三昧经。文殊菩萨偈云。愿我命终时。灭除诸障碍。面见弥陀佛。往生安乐刹。

华严行愿品。普贤菩萨偈云。愿我临欲命终时。尽除一切诸障碍。面见彼佛阿弥陀。即得往生安乐刹。

起信论。马鸣菩萨云。最胜方便。专意念佛。即得往生。终无有退。

楞伽经。佛告大慧。大名德比丘。厥号为龙树。得初欢喜地。往生安乐国。

以上略举四大菩萨。其餘菩萨。修净土者。不可胜纪。

庐山远法师。悟摩诃般若深旨。号东方护法菩萨。而六时念佛。三睹圣像。往生净土。

天台智者大师。妙悟法华。一家教观。万代宗祖。

而生即面西。辨十种疑。疏十六观。极谈净土。

百丈大师。马师传道嫡子。天下丛林共宗。而祈祷病僧。化送亡僧。悉归净土。

清凉国师。绍华严祖位。称文殊后身。而指示弥陀即卢舍那。亦疏观经。弘扬净土。

永明寿禅师。得无碍辩才。柱石宗门。而作四料简。偏赞西方。上品上生。敬及冥府。

死心新禅师。继席黄龙。宗风大振。而切意净业。著劝念佛文。令人发哀起信。

真歇了禅师。嗣丹霞澄公。洞下一宗。至师大显。而卓庵补陀。专意西方。有净土集行世。

慈受深禅师。大悟倩女因缘。一偈融通五教。而谓修行捷径。无如净土。建西方道场。苦心劝众。

圆照本禅师。道续天衣。宗弘雪窦。法雷振地。师表两朝。而净业兼修。标名上品。

中峰本禅师。得法高峰老人。学者仰如山斗。而云禅者净土之禅。净土者禅之净土。有怀净土诗百首。劝人念佛。

以上略举十大尊宿。其余尊宿。及法师。律师。修净土者。不可胜纪。

阿弥陀经。

无量寿经。

十六观经。

鼓音王经。

天亲往生论。

以上略举音说净土经论。其余经论。率说净土者。

不可胜纪。

道安往生论。

怀感群疑论。

慈恩通赞。

海东弥陀疏。

四明妙宗钞。

慈恩忏愿仪。

草堂宝王论。

孤山刊正记西资钞。

大智观音疏。

优昙莲宗宝鉴。

石资乐邦文类。

天如净土或问。

大佑净土指归。

镜道二师念佛镜。

道衍善人咏。

西净土诗。

以上略举最显数家。其余赞扬净土者。不可胜纪。

愿一一考其人。阅其言。思其义。断疑决志。幸甚甚。

征义自序

余少业儒。研究孔孟圣贤之道。而於释氏之书。未之肄及也。庚戌筮任粤东。亡儿用康。究心内典。购得大藏诸经。阐明心要。余因得而遍读焉。遂觉此心旷逸。诸相俱空。慨然有出世之意。爰会金刚经宗旨。提要钩元。名曰金刚经解义。时尚未及净土也。丙寅归田后。友人张子简授余弥陀疏钞。云是云栖大师教人修净土法门也。余受而读之。仰见我佛如来。救度众生。超脱生死。惟此念佛一门。最为简要。而云栖大师。指示迷途。详加引证。实为往生津梁。因撷其精华。分其节次。名曰弥陀疏钞撷。余之修净业自此始。傅大士云。惟有径路修行。但念阿弥陀佛。云栖大师云。念佛为修行径路。而持名又径路中之径路也。吾浙张兰渚中丞集诸家劝修净土之说。著径中径又径一编。立信愿行三法。又分别十二门。至详且要。余不揣冒昧。於其中繁者节之。略者增之。再於各条下。申以绪论。征以故实。复加旁注。以警动众心。其所以感发信愿行之心者。不益切欤。白太傅念佛偈云。日暮而途远。此生已蹉跎。余今年七十矣。夕阳虽好。光景无多。惟有谢绝尘缘。皈依佛法。弥陀一卷。佛号千声。预办资粮。以为生后计。是编也。其为自修自度之左券也夫。

同治七年岁在戊辰四月乐净居士徐槐廷序。

征义张序

净土法门。自东晋庐山远公开创。迄今一千五百
馀年中。不论僧俗男女。不论贵贱智愚。但信有阿弥陀
佛。专心称念佛名者。无不应愿往生。如往生集及
净土圣贤录等书所载。班班可考。何则。无量寿经四
十八愿中有云。十方众生。至心信乐。欲生我国。乃
至十念。若不生者。不取正觉。唯除五逆。诽谤正法。
又偈颂云。我至成佛道。名声超十方。究竟有不闻。
誓不成等觉。然则我在今日。得闻佛名。深愿念佛。
是即佛在西方。得闻我名。深愿念我。惟以佛愿感我
愿。故以我愿应佛愿。感应道交。至捷至灵。是故信
愿念佛。终身不变者。早已念念并入弥陀愿海中。如
水归壑。决定往生。或者疑而问曰。我但晨昏念佛。
日间浩浩。俱属尘劳。且口念佛时。不免杂念起灭。
恍惚无定。欲求一心不乱甚难。未识亦能往生否。答
曰。切勿多疑。亦无论一心散心。特患信行愿三者发
心不真耳。果发真心。此心如长江水。种种杂念如水
上波。往生如江流入海。岂有江流入海时。波不消散
而反能阻碍长流乎。又一人问曰。若然。尽可作恶。
但肯念佛。亦得往生。则西方将成遁逃藪。奈何。曰。
嘻。尔不作恶。尚不肯念佛。而谓作恶者。反肯念佛
乎。且人惟不信佛。故敢作诸恶。未有真实信佛。而
不知为善去恶者。如子所疑。是名诽谤正法。佛不能
救。兰诸张中丞。知世俗种种疑障。可怜可悯。所以
有径中径又径之作。吾邑乐净徐居士。宰粤东时。尝

著**金剛經解義**。刊印廣施。歸田後。斗室清修。與常惺訂忘年交。專談佛法。篤修淨業。以張中丞所著。最足启发信根。嘗手鈔數過。為之條增征義。而以一冊贈惺。珍藏垂三十年。茲遇靜涵陸居士初發心念佛。愿力精進。出示此冊。欽慕其誠。亦手錄一過。愿付粵梨。以廣流通。天靜涵之愿。即張中丞徐居士之愿。亦即阿彌陀佛之大愿光明。所照所感。故凡讀此冊而能發一念信心。發一念愿心。發一念念佛真心。阿彌陀佛。即在尔一念心中。垂手接引。他日蓮池會上。把臂同行。幸勿錯過机缘也。時在光緒二十五年己亥元宵淨業學人海鹽張常惺謹叙於吳門寓齋。時年六十有六。

径中径又径征义目录

卷上 (1)

起信法醒迷门..... (1)

易行门..... (14)

析疑门..... (21)

卷中 (30)

立愿法决定门..... (30)

广度门..... (37)

卷下 (41)

励行法精持门..... (41)

兼观门..... (56)

断爱门..... (61)

仿终门..... (67)

助行门..... (76)

徑中徑又徑征义卷上

清归安张师诚辑 海监徐槐廷征义

起信法

醒迷门

浮生若梦。一切皆空^①。人皆知之。亦能言之。而终日营求靡已。曾不醒悟^②。大率以死后即化。又或以为死即复生。不足为虑。詎知孽报无爽。得人身极难。即得人身。而依然又入梦境^③。轮回六道^④。其苦无涯。欲脱离此苦。舍净土奚归耶。将起其信。先破其迷。辑醒迷门。

宋王龙舒净土文曰。人生时父母妻子屋宅田园。以及器皿衣服等物。无非爱著。仓库既盈。心犹未足。金帛已多。营犹未止。一旦大限到来^⑤。尽皆抛去。虽我有此身^⑥。犹是弃物。况身外者乎。静心思之。恍如一梦^⑦。古人云。一日无常到。方知梦里人。万般将不去。唯有业随身^⑧。妙哉此言。予添作一偈云。万般将不去。唯有业随身。但念阿弥陀^⑨。定生

警：①一语道破②可怪③一场春梦何时醒④循环无已⑤岁月易逝富贵如电世人知之否⑥四大实同幻化⑦当头棒喝⑧二句宜猛省⑨一条生路

极乐国。

昔韩持国靖王实访东坡。言持国自谓癯老。且将声乐酒色以娱年^①。东坡曰。惟其残年。正不当尔^②。顷有一老人。生死之际。极为了然。一日置酒会亲友。酒阑语众。奄奄欲去。诸子呼号。愿留一言为教。老人曰。只宜第一五更起^③。诸子未喻。老人曰。唯五更可勾当自家事。自家事者。是死时将得去者^④。且吾平日治生。今日就化。可将何者去^⑤。诸子顿悟。请君言于持国。勾当自家事。与其劳心声色。不若为死时将得去者计也^⑥。

又曰。此世界中人。皆如水上泡。生灭不常。只见眼前老者。不思不待老而去者多矣^⑦。况世间无非是苦^⑧。即或称意。亦无多时^⑨。平时罪恶。岂得全无。闭眼之后。不免随业缘去。杳杳冥冥。知在何处^⑩。或堕地狱。受诸极苦。或为畜生。受人宰杀^⑪。或生饿鬼。饥火烧身^⑫。或入修罗。瞋恨所迫^⑬。虽有善

警：①是名促死何名娱年②喝醒③五更气清无人事之扰故可办自家事④富贵功名皆非自家事所谓将得去者唯有念佛耳⑤创业老人言之可哀⑥老年宜思此言⑦年少孤坟吾见多矣⑧五浊恶世尽属苦境⑨富贵不过刹时⑩孤魂飘游思之危悚⑪自作自受无可解免⑫三途恶趣⑬修罗道

业。得生天上人间^①。受尽福报。依旧轮回。漂流汨没。无有出期。唯有西方净土^②。最为超脱轮回之捷径^③。色身难得。趁此康健时^④。办此大事^⑤。命终径生极乐世界^⑥。回视死入阴府。见阎王受恐怖者不同矣^⑦。

道彻。钱塘人。乾隆间将示寂。谓其众曰。娑婆之苦。不可说。不可说^⑧。极乐之乐。不可说。不可说。倘蒙记忆。但念阿弥陀佛^⑨。不久当相见。错过此生。轮转长夜。痛哉痛哉^⑩。

死心和尚净土文曰。弥陀甚易念。净土甚易生。而世人不肯信向。但只贪生。不知有死^⑪。人生百岁。七十者稀。大限到来。还他一死^⑫。只如功名富贵人家。财宝如山。妻妾满室。日夜欢乐。他岂不要长生在世。争奈前程有限。暗里相催^⑬。符到便行。不容迟滞。且据诸人眼里亲见。耳里亲闻^⑭。前街后巷。亲情眷属。朋友兄弟。强壮后生。死却多少了也。古云。莫待老来方学道。孤坟尽是少年人^⑮。我劝少

警：①天人道②大救星③免堕轮回受诸苦报④及早回头⑤生死事大⑥一念皈依早生善地⑦可怕森罗殿上铁面无情⑧有难尽言意⑨脱苦境寻乐境只有此法⑩一错百错⑪举世昏昏罔不畏死⑫人能想到死字万种心灰⑬韶光催人易老⑭眼前多少埋荒草⑮可惧

年人。趁此血气刚盛。色力未衰。正好修行^①。奉劝衰老人。最好念佛。年纪朽迈。日月无多。发白面皱^②。眼暗耳聋。头低背曲^③。脚手颤掉。去天甚远。入地甚近^④。不办死路。又待何时^⑤。有儿女人。正好念佛。自从早年娶妻养子。经营家计。受尽千辛万苦。今日儿女长大。家计已成。好将担子分付儿孙。落得现成享福。念佛修行。若不回头。定是痴人。忽然三寸气断^⑥。不免一旦皆休。若是孝顺儿孙^⑦。斋得几众僧。看得几部经。哭得几声。犹是记忆爷娘。若是不肖之子。父母方死。骨头未冷^⑧。作耗财产。出卖田园^⑨。恣意作乐。以此观之。著甚么急。儿孙自有儿孙福。莫为儿孙作远忧。无男女人。正好念佛。孤单一身。无忧无虑。不须男婚。不愁女嫁。粗衣淡饭。多少清闲^⑩。若不修行。后悔何及。富贵人最好念佛。高堂大厦。衣食丰足。百事现成。皆是前世修来。贫穷人正好念佛。衣食不足。贫穷下贱。常受

警：①要修行须及早童颜容易老②夕阳西照 光景须臾③死态现前④相近鬼门关⑤老人针砭⑥西山日薄夜行不休 真是痴⑦好子孙⑧看得透亮⑨尽为子孙游博贤⑩一生无累清静安闲正可修福

饥寒。只因前世不肯修行。遂遭现报^①。若不
改往修来。一死之后。如秤锤落井^②。何时得
出^③。参禅人正好念佛。或根机稍钝。恐今生
未能大悟。且假弥陀愿力。接引往生。如受荫
官。不忧落第。爵禄现成。有等愚人说道。
心好便了。何须念佛。此等邪见。惑乱世人。
古德云。冷笑富家翁^④。营生忙似箭。囤里米
生虫。库中钱烂贯。日里把秤称^⑤。夜间点灯
算。形骸如傀儡。莫教绳索断^⑥。眼光忽落地。
追悔有何便^⑦。汝若念佛不生净土。我堕拔舌
地狱。他年净土花开日^⑧。记得娑婆念佛时。

明莲池大师曰。世尊说人命在呼吸间。当慨然不
乐。痛相警策道。大众。我与你但今日送某僧。明日送某
僧^⑨。不知不觉。轮到自身。此时悔恨无及。须疾忙
念佛。时刻不要放过方好^⑩。我见你们自家也说可惜。
对人也说可惜。及乎堂中估唱。依然谈笑自如^⑪。你
只不信人命在呼吸间也^⑫。

莲池大师骷髅图说一篇曰。傅大士云。渐

警：①宜当下猛省警觉②言之危悚③终身陷溺④富贵浑如草头露
⑤身家愈厚心计愈工⑥怎晓得霎时身丧⑦若待追悔则无及矣⑧因果自
然明⑨眼前经过多少如何不自醒觉⑩空过一生不念佛最为可悲可苦⑪
只是不怕死⑫命终时无及了

渐鸡皮鹤发。看看行步龙钟^①。假饶金玉满堂。难免生老病死^②。任汝千般快乐。无常终是到来^③。惟有径路修行。但念阿弥陀佛^④。大士此语。正所谓万般将不去。惟有业随身是也。如何是万般将不去。人生所有官爵金宝。屋宅田园。饮食衣服玩好。乃至娇妻爱子。无常到来。那一件是将得去者^⑤。如何是惟有业随身。人生所造诸贪瞋痴业。非礼奸淫。恣意宰杀。为子逆父。为臣欺君。克众成家。阴毒害物。种种恶业。无常到来。只是紧紧随著你者^⑥。既然如此。若不猛省回头。改恶从善^⑦。洗心念佛。岂非徒得人身。虚生浪死。苦哉苦哉。我观世人。个个皆好念佛。今以三等列之。一者极闲人。应当无昼无夜^⑧。一心念佛。二者半闲半忙人。应当营事已毕。即便念佛。三者极忙人。应当忙里偷闲。十念念佛。又富贵之人。衣禄丰足。正好念佛。贫穷之人。安贫守分。正好念佛。有子孙人。得人替力。正好念

警：①驱牛就屠所步步近死地②谁能免得③叹阎浮一戏场④谆谆悲劝⑤万事成空⑥神识已离黑业具在⑦苦海无边谁肯回首⑧只有一条路人人可行此三种人就大概说

佛。无子孙人。心无牵挂。正好念佛。无病之人。身力康健。正好念佛。有病之人。知死不久。正好念佛。聪明之人。通经达理。正好念佛。愚钝之人。无杂知见。正好念佛。以要言之。天上人间。四生九有。皆当念佛。奉劝世人。何不趁此四大未作骷髅时。早早念佛。直待万般将不去。惟有业随身。懊悔无及了也^①。

明邵武知府严澄。遗亲故书曰。澄一病几殆。不意复生。虽则苟延。焉知来日。回首营生旧计。有同嚼蜡^②。一具皮囊。终归败坏^③。六尘缘影。何处坚牢^④。不如换却凡心。求生净土^⑤。诵弥陀一句^⑥。消罪业无边。聊奉劝文。用表诚意。

宋师子峰如如颜丙劝修净业文曰。只这色身。谁信身为苦本^⑦。尽贪世乐。不知乐是苦因^⑧。浮生易度。岂是久居。幻质非坚。总归磨灭。自未入胞胎之日。奚有这男女之形。只缘地水火风假合而成。不免生老病死凋残之苦。虚浮如水上泡。须臾不久^⑨。危脆似草头露。倏忽便无。长年者不过六七十以皆亡^⑩。短命

警：①此时错过万劫难回②令人灰心③四大幻身④诸缘假合⑤此生归宿处⑥指示迷途⑦娑婆尽是苦境⑧众人以苦为乐⑨人生浮脆何者可恃⑩人命促於呼吸

者大都三二十而早夭。况乎兽残虫螫。猝不及防^①。屋压车伤。痛何能救。坑坎邱陵之厄。到处堪虞。刀兵水火之灾。何时蔑有。又有今日不知明日事^②。上床别了。下床鞋。几多一息不来。便觉千秋永别。叹此身无有是处。奈谁人不被他瞞^③。筋缠七尺骨头。皮里一包肉块^④。九孔常流不净。六根恣逞无明。发毛爪齿。聚若堆尘。涕泪唾津。污如行厕。里面尽蛆虫聚会^⑤。外头招蚊虱交攢。沾一灾一疾。皆死得人。更大热大寒。催人易老。眼被色牵归饿鬼。耳随声去入阿鼻。口头喫尽味千般。死后只添油几滴。此身无可爱惜。诸人当愿出离。如何迷昧底尚逞风流。懵懂汉犹生颠倒^⑥。或有骷髏上头。簪花簪草^⑦。或有臭皮袋畔。带麝带香。罗衣罩了脓血囊。锦被遮却屎尿桶。用尽奸心百计^⑧。将谓住世万年。不知头痛眼花。阎罗王接人来到^⑨。那更鬓斑齿损。无常鬼寄信相寻。个个恋色贪财。尽是失人身捷径^⑩。

警：①恶缘而死②生死朝暮等浮游③人谁觉悟④臭皮囊何足恋⑤只今便作死尸看⑥人人耽着幻境⑦妻子骷髏队里身⑧无边罪业般般造⑨怎知暗里无常顷刻勾符到⑩因爱生贪因贪造业

日日饮酒食肉^①。无非种地狱深根。眼前图快活一时。身后受苦辛万劫^②。一旦命根绝处。四大风刀割时^③。外则脚手牵抽。内则肝肠痛裂。纵使妻儿相惜。无计留君。假饶骨肉满前。有谁替汝^④。生者空自悲啼痛切。死者不免神识奔驰。前途不见光明。举眼全无伴侣^⑤。过奈河岸。见之无不悲伤。入鬼门关。到者尽皆凄惨^⑥。世上才经七日。阴间押见十王。曹官抱案没人情。狱卒持叉无笑面。平生作善者。送归天道。仙道。人道。在日造恶者。押入汤涂。火涂。刀涂^⑦。镬汤沸若山头。剑树势如峰耸。灌铜汁而遍身肉烂^⑧。吞铁丸而满口烟生。遭刮磕则血肉淋漓。入寒冰则皮肤冻裂。身碎业风吹再活。命终罗刹喝重生。人间历尽几春秋。狱内方为一昼夜。魂魄虽归鬼界。身尸犹卧棺中^⑨。或隔三朝五朝。或当六月七月。腐烂则出虫出血。臭秽则熏地熏天。胖胀不堪观。丑恶真可怕。催促付一堆野火。断送埋万里荒

警：①杀生必偿②报应不饶③四大分离众业缠④经云来而独自来去而独自去轮回独自行果报独自受⑤好苦也黄泉独自影萧萧⑥见之应当悔恨⑦无限造冤愆泥犁苦万千⑧十八重地狱般般受⑨枯骨犹存

山^①。昔时耍俏红颜。翻成灰烬。今日荒凉白骨。变作泥堆。从前恩爱。到此成空。自昔英雄。如今何在^②。泪雨洒时空寂寂。悲风动处冷飕飕。夜阑而鬼哭神号。岁久而鸦餐雀啄。荒草畔漫留碑石^③。绿杨中空挂纸钱。下梢头难免如斯。到这里怎生不醒。大家具眼。及早回头。翻身跳出迷津^④。弹指裂开爱网。休向鬼窟里作活计。要知蒲团上有真人。我佛悲怜。用垂拯救。欲令横超三界^⑤。特开净土一门。四十八愿之宏深。入人心而遍加摄受^⑥。十万亿程之遥远。仗佛力而不隔须臾。托质莲胎。享自然之衣食^⑦。棲神净域。免他道之轮回。是男是女总堪修。若智若愚皆有分。但请回光返照。便知本体原无^⑧。若未能学道参禅。也且是持斋念佛。果能一心不乱。管教七日成功^⑨。移六贼为六神通。离八苦为八自在。净土文。法言可证。往生传。灵迹非虚。对众为大众宣扬。归家为一家解说。使处处齐知觉悟^⑩。

警：①豪华千古伴蓬蒿冷烟寒雨埋荒草②谁解浮生如梦③终须一个土馒头④一场大梦谁先觉⑤脱离陋壳须修证⑥度群迷出火坑⑦愿个个都归安养⑧见此语⑨念念心不乱莲邦指日生⑩只教一个念头坚

教人人尽免沉沦。上助诸佛转法轮。下拔众生离苦海。佛言不信。何言可信。人道不修。他道难修。莫教一日换了皮^①。纵有千佛难救汝。火急进步。时不待人。各且直下承当。莫使此生空过。

明庄严。深达佛理。衣食所餘。悉以施人。常调满庭芳一阙云。六十餘年。片时春梦。觉来刚熟黄梁。浮华幻影。有甚好风光^②。冷眼轻轻觑破。急翻身蹬断丝缰。儿孙戏。从他搬演。何必看终场^③。青山茅一把。残生活计。别作商量。但随缘消遣。洗钵焚香^④。先送心归极乐。恣逍遥。宝树清凉^⑤。堪悲也。回头望处。业海正茫茫^⑥。

净土晨钟载钱孝直曰。从来三界生死轮回。比於牢狱。然则但未出生死^⑦。皆三界狱中囚也。今见纆绁之中。呼天乞命。莫不哀其愚。而嗤其求生之不早。吾谓死囚求生太晚。比之我辈。犹为早计也^⑧。死囚秋决。岁不过一日。一日前后。皆日日为之打点。我辈在三界狱中。月月可死。日日可死^⑨。不论贵贱老少。好人

警：①直待临终空懊恼②叹百年蝇蜗劳扰③儿孙自有儿孙福④皈依空王⑤堪羨莲花世界⑥只愁苦海无边⑦不止苦海⑧远不如囚⑨死字常将挂在眉

恶人。皆可以死。不早打点。姑待一刻^①。万一即此一刻。驾帖到来。刽手当面。手忙脚乱。何以御之。又袁中郎曰。众生处五浊世。如囚处狱。以入狱皆罪人。处人天者。皆是业报分段之身故也。然罪人入狱。时刻求出。以知棘墙之外。更有许大安乐世界故也。今众生以烦恼为家宅^②。以生死为园囿。不知大铁围山。是我棘墙。三界法场之外。各自有家乡乐地^③。诸佛悯此。为分别净秽。指以脱归路程。又大建宅舍以安之^④。分明往来狱门。为治道途。长伺狱外^⑤。修饰旅馆。如是之恩。何身可报。经云。如来为一大事。出现於世。大事者。生死事也^⑥。诸佛既不惜垂手。众生乃死而不悟。哀哉。

昔一僧探俗友。劝以生死事大。急宜念佛。友谢以三头未了。僧问故。友曰。亲柩未葬。男婚女嫁未毕。僧别不久。友忽亡。僧往吊。作诗曰。吾友名为张祖留。劝伊念佛说三头。可怜阎老无分晓。未了三头便去勾^⑦。此言虽浅。大可醒俗。

警：①今日不知明日事②相看不觉泪沾衣③不须人世觅安居④易火宅为安宅⑤黄金地上乐无比⑥谁肯灰心厌生死⑦岁不我与

又曰。自贫贱而视富贵。见其气焰薰灼。不胜垂涎。然当之者。未必真乐也。如一人喜怒不测。忧在事主^①。同列人怀异志。忧在群情。因贪位而患得患失。缘事权而伐异党同。位愈高则责愈重。宠愈隆则忌愈众。事机一失。至求为匹夫不可得。富家翁持筹会计。竭一生心力以遗子孙。而百年兴废。事难逆料^②。身后所有^③。率归他人。由是言之。富贵亦有何荣。纯是苦耳^④。盖富贵胜贫贱者。皆无紧要事。如食以遏饥。衣以御寒。若衣而华。食而精^⑤。此於身心。有何紧要^⑥。其他可知。至大利害处。老也。病也。死也。止此只身。独当一面之孤注^⑦。到钟鸣漏尽光景^⑧。卿相以至氓庶。总无人可代。总同一结煞^⑨。思及此。不由人不当下心灰也^⑩。

明天启初。北京正阳门。有老军看守。螺居无子。胸中无一事。日焚香诵金刚经^⑪。首相韩爌。每乘大轿。腰玉衣蟒^⑫。呼殿过其地。闻声辄叹曰。为我难。

警：①莫道在身官职好②早知泡影须臾事③宛其死矣④视浮云富贵更进一层⑤真说得破⑥未应富贵胜渔樵⑦大限来时各自飞⑧南柯梦短天易晓⑨贵人头上不曾饶⑩及早须修道⑪一丝不挂何等安乐⑫视胸中无事何如

为彼易。而我无彼福也^①。老军七十三而终。六月尸无秽气。飞蝇不集。人皆异之。冒起宗曰。人生不受圭组罗笼。身得自由。眼前无累。便是人间仙福^②。更修最上乘出世正因^③。岂火宅中大富贵可得比乎。

易行门

已识迷途。欲求出世。当知入道多门。惟念佛往生净土为易行。净土多方。又惟往生西方极乐世界之净土。尤为易行。盖阿弥陀佛有四十八大愿。度尽众生。与此世界之缘偏重。威力又极大。故摄取无遗。人能信向。至心持名。未有不蒙接引。所谓仗他之法^④。与专恃自力者。难易迥殊也。辑易行门。

龙舒净土文曰。净土传云。阿弥陀佛与观世音势至二菩萨。乘大愿船。泛生死海。就此娑婆世界。呼引众生上大愿船^⑤。送至西方。如肯往者。无不得生也。观此则是佛与菩萨。怜悯众生。沉沦苦海。无有得出。故自以誓愿威力。招诱人入净土。如舟人招诱行人登舟。送至彼岸也。人唯恐不信耳^⑥。若信心肯往。虽有罪恶。亦无不得生。盖信者。一念也^⑦。若人在生时。心念要去。身则随去。心念欲住。身则随住。是身常随念。然犹有念欲去^⑧。而

警：①念佛是福②人都不知③永作逍遥自在④佛力扶持⑤感西尊时刻勤招引⑥佛法大海信为入门⑦生灭唯此一念⑧尚心为形阻

身被牵系者。身坏时。唯一念而已^①。一念到处。则无不到^②。是以一念在净土^③。则必生净土。况佛与菩萨。又招引人往生乎^④。

往生传。张抗为翰林学士。课大悲咒十万遍。愿生西方^⑤。一日寝疾。唯念佛号。忽谓家人曰。西方净土。只在堂屋西边。阿弥陀佛坐莲华上。翁儿在花地金沙上^⑥。礼拜嬉戏。良久。念佛而化。翁儿抗之孙。已先逝也。盖极乐世界。乃吾心之土耳^⑦。约里有十万亿。心则原无远近^⑧。故楞严经云。临命终时。未捨煖触。一生善恶。当时顿现^⑨。纯想即飞。必生天上^⑩。若兼福兼慧。及与净愿。自然心开。见十方佛。一切净土。随愿往生^⑪。

宋丞相郑清之曰。今之学佛者。不过禅教律。究竟圆顿莫如禅^⑫。非利根上器。神领意解者。未免蹈顽空之失。研究三乘莫如教。非得鱼忘筌。因指见月者^⑬。未免钻故纸之谓。护善遮恶莫如律。非身心清静。表里如一者。未免自缠缚之苦。总而观之。论其所入。则禅

警：①神识不灭②动念即往生时③唯心净土④也要弥陀作导师⑤立愿皈依⑥去此不远随在即西方惟寸心专注自成莲花世界⑦心净即佛土净⑧西方去此不远⑨六道轮回随心而去⑩纯想即善念⑪信行以愿为主⑫单提话头究未易顿悟⑬大小止观下手安心亦不易入

教律。要其所归。则戒定慧。不由禅教律。而得戒定慧者^①。其唯净土之一门乎。方念佛时。口诵心维。诸恶莫作^②。岂非戒。系念净境。幻尘俱灭^③。岂非定。念实无念。心华湛然^④。岂非慧。人所屏除万虑。一意西方^⑤。则不施棒喝。而悟圆顿机。不阅大藏经。而得正法眼。不持四威仪中。而得大自在。不垢不净。无缠无脱。当是时也。孰为戒定慧。孰为禅教律。我心佛心。一无差别^⑥。此修净土之极致也。八功德水。金莲花台。又何必疑哉。

莲池大师曰。大藏经所詮者。不过戒定慧而已。念佛即是戒定慧。何必随文逐字。阅此藏经。光阴迅速^⑦。命不坚久。愿诸人以净业为急务。

莲池大师曰。径路修行者。路小而捷名径。小喻念佛为力之简易^⑧。捷喻念佛成功之迅速^⑨。善导大师偈云。唯有径路修行。但念阿弥陀佛是也。故云。徐门学道。名竖出三界^⑩。念佛往生。名横出三界^⑪。如虫在竹。竖则历

警：①万法归一②远诸染故③不散乱故④不退转故⑤一心注念⑥即心即佛⑦无暇参究⑧一句弥陀⑨七日成功⑩十人九错路⑪万修万人去

节难通^①。横则一时透脱。馀门之比念佛。则念佛为速矣。念佛复有多门者。如实相念佛四种。乃至万行回向等。实相之佛。虽云本具。而众生障重^②。解悟者希。下此数门。观像则像去还无。因成间断。观想则心粗境细^③。妙观难成。万行则所作繁多^④。重处偏坠。唯此持名一法。简要直捷。但能继念。便得往生^⑤。古人谓既得见弥陀。何愁不开悟^⑥。则不期实相而实相契焉^⑦。故念佛为修行径路。而持名又念佛中之径路也^⑧。

桐江法师云。成佛有横竖二出。竖出者声闻修四谛。缘觉修十二因缘。菩萨修六度万行。此涉境位。譬如及第。须有才学。又如历任转官。须有功效。横出者。念佛求生净土^⑨。譬如荫叙。功由祖父他力^⑩。不问学业有无。又如覃恩普转。功繇国王^⑪。不论历任深浅。其难易有迥殊矣。

莲宗宝鉴云。娑婆浊境。众苦集而求道难成。净土乐邦。诸善聚而位登不退^⑫。称名号

警：①设喻精确②识自本性为自心佛③作西方观④六度波罗蜜⑤不论智愚单持一句念念相续便能往生⑥先往 生后觉悟⑦自得本性弥陀⑧事半功倍⑨径路横超只此门⑩念佛为佛弟子⑪又为法王子⑫皆阿鞞跋致

者。诸佛护念而往生^①。发菩提者。弥陀光照而增进^②。菩萨罗汉。与其同侍^③。水鸟树林。悉皆念佛。耳畔常闻妙法。心中顿绝贪瞋。快乐无穷。寿量何极。一生彼土。更不退转。岂比人天道中。触目多诸违顺。权乘路上。善根希有周圆。所以三乘之士。历阿僧劫而功行难成^④。念佛之门。於彈指顷而往生安养^⑤。初学机浅。非他力难以进修。我佛愿深。但有缘悉皆摄受^⑥。馀门学道。如蚁子上於高山^⑦。净土往生。似风帆行於顺水^⑧。弥陀接引。直趣菩提。众圣提携。高超三界。上品即登佛果。下生犹胜天宫。普信不疑。同修不退。

云栖事略。邻有老姬。日课佛名数千。问其故。姬曰。先夫持佛名。临终无病。与人一拱而别^⑨。故知念佛功德。不可思议。师自此栖心净土。书生死事大於案头以自策^⑩。

西方公据云。诸善人。世间有千条万条路。如何只劝人念佛。人之念头。所系甚重。牵魂引魄。造命生身。莫不由此^⑪。念善上天堂。

警：①众圣现前②佛光摄取③妙庄严都在弥陀经上④六度万行⑤十万馀程近如咫尺⑥六八誓宏亲摄受⑦历劫难到⑧一霎即至⑨临终洒然⑩死生呼吸间⑪万法虚伪唯是一心了悟自心触目菩提

念恶下地狱。一念直为人。一念横为畜。如何是饿鬼。只因念不足。念魔还成魔。念佛便成佛。若要免六道。除非只念佛^①。若还不念佛。一失下人身。万劫难再得^②。所以释迦如来。教人念佛。远公法师。教人念佛。念佛不能了生死。佛祖如何肯误人。念佛不成佛。其过不在佛。口念心不念。虽念如未念^③。饶你一生。也不当一声。念字从心。原不从口。而念一生心。声随口出^④。心佛口佛。两不可废。千佛万佛。如何只念阿弥陀佛^⑤。以其原有四十八愿。誓度尽十方众生。其中有曰。若十方世界一切众生。能称我阿弥陀佛名号。而不生我国者。誓不成佛。其土具载阿弥陀经。是名西方极乐世界。呜呼。人间富贵。百岁成空^⑥。天上繁华。千年则止^⑦。一入西方极乐世界。便有无量之寿^⑧。而其往生之法。又只凭一句弥陀^⑨。世间有这样极便宜好事。却不肯干。又到那里著铁鞋而问至道^⑩。而今而后。急须发下誓愿。若某不念佛。不求生西方极乐世界。

警。①度脱轮回要一心正念②恶道易沦③口头游滑念亦何功④字字从心上照过历历分明⑤单注西方⑥阎浮寿少⑦天宫代谢⑧净土长年⑨持名之法如单方治病简要直捷⑩一念专注即到彼岸莫要错过机缘

则为鬼而永堕北阴酆都地狱^①。已而已而。三藏十二部。让与别人悟^②。八万四千门。饶与别人行。一句南无阿弥陀佛之外^③。不用一字。各自去扫净室一间。供佛像一尊。每日烧清香一炉。换净水一碗。夜来上明灯一盏。纸画木雕。即同真佛。早晚朝参。必诚必敬^④。一串数珠不离手^⑤。一句弥陀不离口。高声念。低声念。六字念。四字念。紧念。缓念。朗念。默念^⑥。合手念。跪膝念。面佛念。朝西念。敲鱼念。掐珠念。行道念。礼拜念。独自念。同众念。在家念。在外念。闲也念。忙也念。行也念。住也念。坐也念。卧也念。连梦中也念。才是真念。念得心酸泪下^⑦。念得火灭灰寒^⑧。念得神号鬼哭^⑨。念得天喜地欢^⑩。镬汤在后。莲池在前。虽千万人阻我不念^⑪。不可得也。

善导和尚立专杂二修。杂修者。谓散漫修诸善业。回向庄严。专修者。身须专礼阿弥陀佛。不杂余礼^⑫。口须专称阿弥陀佛。不称余号。不诵余经咒。意须专

警：①心常恐惧②用志不纷③修行秘要不在多言④至要⑤无间断⑥弥陀经执持名号即是四字念⑦真心痛切⑧妄念退休⑨魔种尽灭⑩天人恭敬⑪只进勿退八字鞭辟得紧⑫身口意三业专注弥陀

想阿弥陀佛。不修餘观。专修者。百即百生。千即千生^①。若杂修者。百中或得一二人生^②。千中或得三五人生。

汉月禅师曰。求生净土。法门最广。单取紧峭无渗漏为上。故持经次於持咒。持咒次於作观。作观次於持名。持六字不如持四字。盖於持名减省^③。易於成功故也。然持名之法。拨珠课诵。又涉泛濛。虽念而宽。不得成就。须是极力。四字佛名。一句追一句。一声顶一声^④。若一日乃至七日。念至虚空粉碎。五蕴冰消^⑤。谓之一心不乱。此便是净业已成。往生有日矣。

云栖法汇。问。经文只云执持名号。似只四字。今尽从六字。毕竟何者为是。大师自用何法。答。四字自念。六字从众^⑥。

析疑门

人闻易行之说。往往疑而不修。即修行已久者。亦有中道游移。疑情日起。或堕前功。或趋外道。因疑而误。流弊无穷。夫往生净土。原非即能成佛。所恃者。常不离佛。永无退转。必能成佛而后已^⑦。为把稳生涯耳。智者十疑论。天如或问。云栖四十八问

警：①心无二用故②只有福慧不生净土③以简易胜④如线贯珠无空隙处⑤定要敌过妄想⑥通融随顺⑦但得见弥陀何愁不开悟

答。不憚往復辯論。至明至切。此門惟采昔賢問難雜說著於篇。以斷其疑。輯析疑門。

慧覺玉禪師曰。或謂淨土乃聖人之權方。所以接鈍根。化凡器也。苟能一超直入如來地。何藉於他力乎。答曰。佛世文殊普賢。滅後馬鳴龍樹。此土智者智覺。皆發願往生^①。應盡是鈍根乎。釋迦於大寶積經。勸父王淨飯^②。并七萬釋種。皆生淨土。應盡是凡器乎。此等聖賢。應皆不逮今之利根勝器乎^③。況以此為權。將何為實。昔孫莘老亦疑於此。因會楊次公王敏中辯論。遂息此疑焉。

按普賢偈云。願我臨欲命終時。盡除一切諸障礙。面見彼佛阿彌陀。即得往生安樂剎。文殊偈亦如是。馬鳴尊者著起信論。末後勸人求生淨土。龍樹尊者造毗婆沙論。有稱贊彌陀偈。寶積經云。佛言。父王。今當念西方世界阿彌陀佛。常勤精進。當得佛道。爾時父王與七萬釋種。聞說是法。信解歡喜。悟無生忍。

王龍舒曰。或者疑之云。人世念佛。西方七寶池中。如何便生蓮花一朵。予告云。此不難知。譬如大明鏡^④。凡有物來。便現其影^⑤。

警：①紹祖師位能如二菩薩否②佛豈肯誑父③古來聖賢名流皆由佛教得來④鏡無遁形⑤纖悉必現

镜何尝容心哉。以其明而自然耳。阿弥陀佛国中。清净明洁。自然照见十方世界^①。犹如明镜。睹其面像。是故此间念佛。西方七宝池。自然生莲花一朵^②。无足疑也。或者又疑之云。念往生真言者。阿弥陀佛。常住其顶。卫护其人。若无量世界。有无量众生。念此真言。阿弥陀佛。岂能一一遍住其顶乎。曰。亦自然耳。譬如天上一月。普现一切水中^③。岂不自然哉。或者又疑之云。有临终之时。佛与菩萨来迎。且如十方世界。有无量众生精进。乌能皆知其期而往迎乎。曰。亦自然耳。譬如天上一日。普照无量境界^④。岂不自然哉。况佛之威神。不止如日月乎。则遍住其顶。遍知其期。何足疑哉。

净土决疑序云。阿弥陀佛光明。如大圆月。遍照十方。水清而静。则月现全体^⑤。月非趋水而遽来。水浊而动。则月无定光。月非捨水而遽去。在水则有清浊动静。在月则无趋捨去来。故优昙云。化体即真。说无去来。从真流化。现有往还。不来而来。似水月之顿呈^⑥。不见而见。犹行云之忽现。

王龙舒曰。人骤闻净土之景象。多不信之。

警：①佛光普照悉知悉见②清净世界莲花自开③千潭月印只是一月④光明遍照处处见佛⑤是心是佛心清即现⑥随心变化

无足怪也。盖拘於目前所见。遂谓目前所不见者^①。亦如是而已。不知佛切戒人以妄语。必不自妄语以诳人^②。世人妄语者。非以规利。即以避害^③。佛无求於世。何规利之有。佛视死生如刀斫虚空。何避害之有。是佛无所用其妄语也。世间中人以上者。犹不肯妄语以丧其行止^④。况佛乎。其言可信。无足疑者。况自古迄今修此者。感应甚多^⑤。尤不可不信也。

李卓吾曰。当时释迦牟尼金口称赞。有阿弥陀佛在西方极乐国土。专一接引念佛众生。以此观之。是为有国土乎。无国土乎。若无国土。则阿弥陀佛为假名^⑥。莲华为假相。接引为假说。互相欺诳。佛当受弥天大罪^⑦。当即时败露。安能引万亿劫聪明豪杰。並僧俗男女。同生信向乎。何以问我有无形相国土为也。

王龙舒曰。或云。人诵佛名。一向称诵。正如呼一人。一向呼之。其人必怒^⑧。故一向诵佛名者。未足为善也。答曰。是不然。众人自无始以来。口业过恶。积如山海。多诵佛名

警：①少见多怪②妄语为口四业 佛家最戒③妄语有因④世之不信者视佛何等⑤实有其事⑥汝今所居此土是有是无此土既有净土独无乎⑦辩驳甚明⑧诚有是疑

以滌蕩之。犹惧不足。岂可以称呼常人之名为比也^①。况诸佛自开此念诵法门^②。所以诱掖众生善其口业。以渐善其身意^③。故谓一向诵佛名。未足为善者。此世俗之言。非诸佛诱掖众生之言也。

先生谓予尝於镇江闻卖虾者。叫虾一声。而知其三业俱恶。何则。身荷虾担。则身业恶^④。意欲卖虾。则意业恶。口叫卖虾。则口业恶。三业俱恶。此佛所谓地狱人也。若口念佛名。则口业善^⑤。口念佛时。又能心想佛像。则意业善。端正其身。而手提数珠。则身业善。常能善此三业。以修净土。必上品生。

莲池大师云。有谓唯心净土。无复十万亿刹外。更有极乐净土。此唯心之说。原出经语。真实非谬。但引而据之者。错会其旨。夫即心即境^⑥。终无心外之境。即境即心。亦无境外之心^⑦。既境全是心。何须定执心而斥境。拨境言心。未为达心者矣。或又曰。临终所见净土。皆是自心。故无净土。不思古今念佛往生者。

警：①解释得透彻所谓灭八十亿劫重罪也②正是奉行佛教③一事而三善俱备④不特卖虾即凡杀生之业皆是孟子所以有择术不可不慎之语⑤念佛三业俱善即证菩提⑥此言其理⑦有心即有境不得谓有心无境

其临终圣众来迎。与天乐异香幢幡楼阁等^①。惟彼一人独见。可云自心。而一时大众。悉皆见之^②。有闻天乐隐隐向西而去者。有异香在室。多日不散者。夫天乐不向他方。而西向以去。彼人已故。此香犹在^③。是犹得谓无净土乎。圆照本禅师。人见其标名莲品。岂得他人之心。作圆照之心乎。又试问汝临终地狱相现者非心乎^④。曰。心也。其人堕地狱乎。曰。堕也。夫既堕地狱。则地狱之有明矣。净土独无乎^⑤。心现地狱者。堕实有之地狱。心现净土者^⑥。不生实有之净土乎。

宋圆照本禅师。居慧林。平时密修净业。时雷峰才法师。神游净土。见一殿殊丽。问之。曰待净慈本禅师耳。又资福曦公至慧林。公礼足施金而去。人诘其故。曰。吾定中见金莲华。人言以俟慧林本公。其他莲华无数。云以待受度者。或有萎者。云是退堕人也。后临终安坐而逝。

天如净土或问曰。人都道净业只是身后事。於今目前。无所利济。答曰。汝之所见未广也。

警：①此言其事 ②人人共见 人人共闻 ③若非实有是境何以有音乐异香足破群疑④从对面看益见可信⑤既有地狱 必有净土何可抹煞⑥迎刃而解

岂不见经中道。受持佛名者。现世当获十种胜利。一者。常得一切诸天神^①。隐形守护。二者。常得一切菩萨。常随守护。三者。常得诸佛昼夜护念。阿弥陀佛。常放光明。摄受此人。四者。一切恶鬼。皆不能害^②。一切蛇龙毒药。悉不能中。五者。水火冤贼。刀箭牢狱。横死枉生。悉皆不受。六者。先所作业。悉皆消灭。所杀冤命。彼蒙解脱。更无执对。七者。夜梦正直^③。或梦见阿弥陀佛胜妙色像。八者。心常欢喜。所作吉利。九者。常为一切世间人民。恭敬欢喜礼拜。十者。命终之时。心无怖畏^④。正念现前。得见阿弥陀佛及诸圣众持金莲华。接引往生西方净土。如上十种利益。经文具载。乃佛口之所宣也。既是现生来世。皆有利益。然则世出世间要紧法门。无如念佛者矣。但当精进。勿用怀疑。

龙舒净土文。叙现世念佛感应一卷。有念佛却鬼。如陈企者。有念佛脱难。如邵希文者。有念佛安寝。如刘仲慧者。有念佛屋不压死。如瞽妇者。有念佛疟疾遂愈。如李子清者。有念佛眼明。如阮嫂者。有念

警。①神佛护庇有三②恶缘退避有三③身心安泰有三④临终见佛

卷一

佛痼疾皆愈。如梁氏女者。有念佛治病得愈。如秀州僧者。有念佛孙儿免难。如乡老者。有见杀生念佛得福。如郑邻者。由此推之。念佛胜利。岂但十种而已哉。

慈照宗主净土十门告诫云。念佛人临终三疑。不生净土。一者。疑我生来作业极重。修行日浅^①。恐不得生。二者。疑我虽念弥陀。或有心愿未了。及贪瞋痴爱未息^②。恐不得生。三者。疑我虽念弥陀。临命终时。恐佛不来迎接^③。有此三疑。因疑成障。失其正念^④。不得往生。故念佛之人。切要谛信佛经明旨。勿生疑心。经云。念阿弥陀佛一声。灭八十亿劫生死重罪。上至一心不乱。下至十念成功。接向九莲^⑤。令辞五浊。苟能心心不昧。念念无差。则疑情永断。决定往生矣。

无为杨次公曰。火车可灭。舟石不沉。现杀报者。莫甚於张馘。十念而超胜处。入地狱者。莫速於雄俊。再苏而证妙因。世人愈尤。未必若此。谓不能生者。何自弃哉。

陈瓚。明进士。一意净业。客曰。尔不闻

警：①疑念佛无益②疑念佛不诚③疑念佛无灵④无信心则不生⑤三品往生

大鉴之论唯心乎。何厌垢而欣净为。答曰。唯心净土。发之大鉴。而非自大鉴始也。是心作佛。是心是佛。佛固先言之矣。盖惧人以不净之心求净土也。非曰土无垢净也^①。且乐邦之可乐也。不独华池珠阁。鸟音风树云尔也。吾幸与群圣人游^②。被无量光。经无数佛。证无生忍。成无上道。济无边众。诚乐矣。客以客之禅乐垢土^③。我以我之禅乐净土^④。客无庸呵我矣。

瓚。万历中累官刑部侍郎。卧疾诵佛益虔。故事。京师大臣三品以上。暑月赐冰。既置冰於榻前。众见冰中涌出七级浮屠。栏楯钩绶。窗格玲珑^⑤。移时冰渐消。塔影渐瘦。顷之气绝而影没矣。

警：①通论论惟心净乃生净土心与土是一是二②诸上善人谈法性
③不求生净土④常乐我净⑤佛法不可思议总因心净故见此相

径中径又径征义卷中

立愿法

决定门

信而无愿。信即虚浮。即有愿矣。或以此生已晚。功效难期。惟求来世为人。出家修行。此意非不甚善。殊不思今世所造之业。能必来世为人乎。能必为人仍知佛法乎^①。一蹉百蹉。悔之无及。必须拼此一生。咬定牙根。非往极乐国土不可。非此生即往不可^②。如此发愿。方可谓之决定。愿既坚决。功自精进。有志竟成。岂虚语哉。辑决定门。

五代永明延寿禅师曰。九品经文。自有升降。上下该摄。不出二心。一定心。如修习定观^③。上品往生。二专心。但念名号^④。众善资熏。回向发愿。得成末品。仍须一生皈命。尽报精修^⑤。坐卧之间。面常西向。当行道礼敬之际。念佛发愿之时。恳苦翘诚。无诸异念。如就刑狱^⑥。若在狴牢。怨贼所追^⑦。水火所逼。一心求救^⑧。愿脱苦轮。速证无生。广度含识^⑨。绍隆三宝。誓报四恩。如斯至诚。必不虚弃。如或言行不称。信力轻微。无念念相续之心。有数数间断之意。

管：①此身不向今生度更向何生度此身②立定主意以往生 极乐为归宿安得不勇猛精进 ③一心不乱④十念成功⑤定专心二心归于决定一心⑥地危⑦势迫⑧求脱苦难刻不自缓⑨自度度人

似此懈怠。临终望生。但为业障所牵。恐难值其善友。风火逼迫。正念不成。何以故。而今是因。临终是果。应须因实。果则不虚^①。声和则响顺。形直则影端也。

藕益大师曰。九品谓深信切愿念佛^②。而念佛时心多散乱者。即是下品下生。深信切愿念佛。而念佛时散乱渐少者。即是下品中生。深信切愿念佛。而念佛时便不散乱者。即是下品上生。念到事一心不乱。不起贪瞋痴者。即是中三品生。念到事一心不乱。任运先断见思尘沙。亦能伏断无明者。即是上三品生。总不外乎定专二心。

元优昙大师曰。真信修行之事。端的是要生极乐世界。专意一念。持一句阿弥陀佛。只此一念。是我本师^③。只此一念。即是化佛^④。只此一念。是破地狱之猛将^⑤。只此一念。是斩群邪之宝剑^⑥。只此一念。是开黑暗之明灯^⑦。只此一念。是渡苦海之大船^⑧。只此一念。是医生死之良方^⑨。只此一念。是出三界之径路^⑩。只此一念。是本性弥陀^⑪。只此一念。达唯心净土^⑫。但只要记得这一句阿弥陀佛在

警：①春种一粒谷秋收万颗子②先从信愿入③即心是佛④何佛非心⑤永免恶道⑥立破群迷⑦大开觉路⑧速登彼岸⑨出生入死⑩超凡入圣⑪清净法身⑫自性西方

念。莫教失落。念念常现前。念念不离心。无事也如是念。有事也如是念。安乐也如是念。病苦也如是念^①。生也如是念。死也如是念^②。如是一念分明不昧。又何必问人觅归程乎。

苏东坡曰。佛以大圆觉。充满河沙界。我以颠倒想。出没生死中。云何以一念。得往生净土。我造无始业。本从一念生。既从一念生。还从一念灭^③。生灭灭尽处。则我与佛同。如投水海中。如风中鼓囊。虽有大圣智。亦不能分别。

又曰。凡修净土之人。灼然自要敌他生死。不是说了便休。当念无常迅速。时不待人^④。须是把做一件事始得。若也半进半退。似信似疑。到了济得甚么边事。如何出离轮回。若是信得及^⑤。便从今日去^⑥。发大勇猛。发大精进。莫问会与不会^⑦。见性不见性。但只执持一句南无阿弥陀佛。如靠著一座须弥山相似^⑧。摇撼不动。专其心。一其意。或参念观念。忆念。十念。或默念。专念。系念。礼念。念念在兹。常忆常念。朝也念。暮也念。行也念。坐也念。心念不空过。

警：①口头说著心头注著不论境界只是一念方得成功②毕命为期③心生则种种法生心灭则种种法灭④人生如呼吸要立定主意⑤先要信心⑥苟日新日日新⑦不必参究谈禅⑧将一句弥陀作无义味语一念万年

念佛不离心。日日时时^①。不要放舍。绵绵密密^②。如鸡抱卵。常教暖气相接。即是相净念继。更加智照^③。则知净土即是自心。此乃上智人修进工夫。如此把得定。做得主。靠得稳。縱遇苦乐逆顺境界现前^④。只是念阿弥陀佛。无一念变异心^⑤。无一念退惰心^⑥。无一念杂想心^⑦。直至尽生。永无别心。决定要生西方极乐世界^⑧。果能如是用功。则历劫无明生死业障。自然消殒。尘劳习漏。自然净尽无余。亲见弥陀。不离本念。功成行满。愿力相资。临命终时。定生上品。

淮阳晓山和尚修念佛箴云。示汝诸有情。可以整心趣。弃却贪瞋痴。大家秉智慧。冷眼挂眉间。看破红尘事^⑨。积金玉如山。难买三寸气^⑩。眷属与恩亲。暂如傀儡戏^⑪。生前一聚首。死后谁能替^⑫。终有散场时。有甚风流致。静里细思量。一场无滋味^⑬。何不早休心。念佛修三昧^⑭。

又曰。今人皈投佛会。或为病苦而发心^⑮。或为报亲而举念。或为保扶家室。或为怖罪持

警：①把持得定②是事一心③是理一心④造次颠沛必于是⑤不改易⑥不退转⑦不散乱⑧毕命不更⑨惟慧眼能看破⑩一钱带不去⑪终不能久聚⑫惟当独往⑬竟是空华⑭立定主意⑮此数者皆非愿生乐土

斋。虽有信心。而无行愿。罕有为自己生死^①。发愿念佛。求生净土者。与经中本意不合。修行弟子。当一念回光。修出世法。愿舍娑婆^②。往生净土。正如久客在他乡。思欲归于故里也。求生净土。在乎愿力坚强^③。华严经言。是人临命终时。一切诸根。悉皆散坏。惟此愿王。不相舍离^④。于一切时。引导其前。一刹那中。即得往生极乐世界。

念佛原以了生死。莲池大师常书生死事大四字於案头以自策。及临终谓弟子曰。老实念佛^⑤莫换题目。

藕益大师曰。夫念佛法门。别无奇特。只是深信力行为要耳^⑥。可惜今人将念佛看做浅近勾当。谓愚夫愚妇工夫。所以信既不深^⑦。行亦不力。终日悠悠。净功莫克。只贵信得及。守得稳^⑧。直下念去。或昼夜十万。或五万。三万。以决定不缺为准。毕此一生。誓无改变^⑨。而不得往生者。三世诸佛。便为诳语。一得往生。则永无退转。真能念佛。放下身心

警：①切中时弊②横截生死不受轮回③应当发愿④愿常终似影随身⑤付嘱语切⑥信行以成其愿⑦愚夫愚妇以实信有净土反得往生⑧歧路亡羊专注中鹄⑨不惑他歧

世界^①。即大布施。真能念佛。不复起贪瞋痴^②。即大持戒。真能念佛。不计是非人我^③。即大忍辱。真能念佛。不稍间断夹杂^④。即大精进。真能念佛。不复妄想驰逐^⑤。即大禅定。真能念佛。不为他歧所惑^⑥。即大智慧。要到一心不乱境界。亦无他术。最初下手。须用数珠记得分明。刻定课程。决定无缺。久久纯熟^⑦。不念自念。然后记数亦得。不记数亦得。若初心便要著相。要学圆融自在。总是信不深。行不力。皆生死岸边事。临命终时。决用不著。

优昙大师曰。念佛人要知六度万行。不出一心。人能执持一句阿弥陀佛。得成三昧。一念之中。与理相应。诸法现前。六度万行。悉皆具足。

莲池大师曰。或问今见世人念佛者多。生西方成佛者少。何也。此有三故。一者。口虽念佛^⑧。心中不善。以此不得往生。奉劝世人。既是念佛。便要依佛所说。要积德修福^⑨。要孝顺父母。要忠事君王。要兄弟相爱。要夫妻相敬。要至诚信实。要柔和忍耐。要公平正直。

警：①无住心②清静心③平等心④纯一心⑤真空心⑥寂照心⑦绵密不忘纯任自然⑧口是心非⑨持戒修福为本

要阴鹭方便。要慈惠一切。不杀害生命。不凌辱下人。不欺压小民。但有不好心起。著力念佛。定要念退这不好心^①。如是才是念佛的人。定得成佛。二者。口虽念佛。心中胡思乱想^②。以此不得往生。奉劝世人。念佛之时。按定心猿意马。字字分明。心心照管。如亲在西方面对^③。不敢散乱。如此才是念佛的人。定得成佛。三者。口虽念佛。心中只愿求生富贵^④。或说我等凡夫。西方无有我分。止图来世不失人身^⑤。此则不合佛心。佛指引你生西方。你却自不愿生^⑥。以此不得往生。奉劝世人。凡念佛者。决意求生。休得疑惑。且如天官富贵。福尽也要堕落。何况人间富贵^⑦。能有几时。若说你是凡夫。西方无分。则圣贤都是凡夫做。安知你不生西方也^⑧。便可发广大心^⑨。立坚固志。誓愿往生。见佛闻法^⑩。得无上果。广度众生^⑪。如此才是念佛的人。定得成佛。

警：①正念现前杂念退休②妄念夹杂③应兼作观④不脱尘缘⑤俗说前生修来⑥愚夫愚妇不知有西方⑦亦终福尽堕落⑧即非凡夫⑨立心成佛不成不休⑩自度⑪广度

苏东坡为五祖戒禅师后身^①。常以阿弥陀佛像自随。谓生西方公据。然闻公疾革时。语及西方。则曰。西方不无。但个里著力不得。夫修净土者。必具三心。所谓深心。至诚心。回向发愿心^②。乃至临终十念。未有不著力而得者^③。至云著力不得。则三心未具。难保往生。

广度门

夫决定之愿者。自利复当利他。未能自度。而先度人。自他俱溺。固属非宜。只求自度。而不度人^④。即落二乘浅见。尤为不合佛心。力虽未充。心无不具。儒书言自新新民。己立立人。皆是理也。辑广度门。

龙舒净土文曰。予为此净土说。欲劝一切见者闻者。广大其心。以佛之心为心。使人人尽生净土^⑤。若止于自修。则是声闻之徒。名为小乘^⑥。如车乘之小者。仅能自济而已^⑦。能广劝人者。名为大乘菩萨。如车乘之大者^⑧。人我兼济。此获福无量。所以至佛地也。劝人善道^⑨。名为法施。净土法门^⑩。为法施之大者。遂超出轮回。非其他法施之比。故其福报。不可穷尽。大慈菩萨云。能劝二人修。比自己

警：①戒禅师住五祖山②不浅尝不虚浮不游移③至言④自了汉非大乘人⑤发宏誓愿自度度人是大乘⑥羊鹿车⑦自度汉为阿罗汉果⑧白牛车⑨劝人学佛⑩法施异于财施

精进。劝至千余人。福德已无量。如劝百与千。名为真菩萨。又能过万数。即是阿弥陀。观此则知西方之说者。岂可不广大其心。而使人人共知此道。以积无量福报乎。

文彦博历任宋仁英神哲四朝。素皈依佛法。晚向道益力。专念阿弥陀佛。发愿云。愿我常精进。勤修一切善。愿我了心宗。广度诸含识。集十万人为净土会^①。一时士大夫多化焉。年九十二卒。

又曰。人苦饥者。与之一食。苦寒者。与之一衣。已为大惠。况彼沉沦六道。无有出期。我指示以此法门。使直脱轮回。受无穷无极之寿乐。其惠岂可穷尽乎。何则。净土更无轮回。已不退转。直至成佛而后已。生于彼者。虽未成佛^②。乃成佛之阶梯。是劝一人修净土。乃成就一众生作佛也^③。众生作佛。皆由我而始。则其福报。不胜于以恒河沙等身布施耶。

汝州二沙弥。同志念佛。经五年。长者先亡。至净土见佛。自言有小沙弥与我同修。可得生否。佛言。由彼劝汝。汝方发心。汝今可归。益修净业。三年后。当同来此。至期。二人见佛与圣众。自西而来。大地震动。天花飘舞。一时同化。

警：①即是弥陀②已是菩萨③有大誓愿乃为大乘

优昙大师云。学佛多门。大悲是菩萨正辙。利他要行。劝进乃净业胜因。经言。若人以四天下七宝。供养佛及菩萨缘觉声闻。得福甚多。不如劝人念佛一声。其福胜彼。诚以财施。则济一世之贫。食施。则济一日之命。法施。则令人出世。其功德岂可比伦。财施如灯。止明一室。法施则如日。遍照大千^①。吝法而不劝修。累劫沉于黑狱。念佛而行化导。现生即是弥陀。广布慈云。遽相劝勉。推斯悲愿。普结净缘。拔沉溺之爱河。出轮回之苦海。齐登乐土。共报佛恩。

宋冯栻发愿文云。予之施经。一事而具二施。以资造经。是谓财施。以经传法。是谓法施。财施当得天上人间福德之报。法施当得世智辩聪盖世之报。当知二报。皆轮回之因。苦报之本。我今发愿。愿回此二报。临命终时^②。庄严往生西方极乐世界。普与众生。悉得成佛。

又曰。佛言自未得度。先欲度人者。菩萨发心。自觉已圆。复觉他者。如来应世。莲宗祖训。创立净土一门。行解相值。自利利人。化物无方。诲人不倦。称曰导师。维摩经云。

警：①佛日光辉②福慧双修即回向净土

自疾不能救。云何救他疾。地狱报应经云。自不清净。教人清静。无有是处。智度论云。譬如二人。各有亲属。为水所溺。一人情急。直入水救。为无方便。彼此俱没。一人往取船筏。乘之救济。悉皆度脱。念佛法门。须自修自行。一一修持。一一成就。既自利。然后利人^①。是乘弥陀之大愿力船。救济苦海中之沉溺也。其功德岂易量哉。

昔释迦佛在世时。有一国难化。佛言与目连有缘。使往化之。其国人果皆从化。人问其故。佛言。往昔世目连尝为樵人。於山中惊起一群蜂子。目连乃发善言曰。我得道后。尽度此蜂子。今此一城人者。乃当时蜂子也。目连发此善言。故为有缘。由此观之。非徒於一切人当劝修净土。一切禽兽蠕动之类^②。见之皆当念阿弥陀佛数声。发愿尽度。如是则善念纯熟上品上生矣。

警：①成己成人原是一理②九种度生

径中径又径征义卷下

励行法

精持门

信既笃矣。愿既坚矣。无实行以自励。则信为徒信。愿为徒愿。空言无补。何能幸获。凡事必有苦行。方可成就。况出世之大乎。今不必万行全修。只此至易持名之径路。犹不精心果力。可乎。持名者须以心念。莫但口念^①。平时妄念纷飞。无由觉察。一经手提数珠。始觉此心之难制^②。余根钝障深。向用强制之法。手掐此珠。心随此手^③。勿使一珠空过。庶几稍有把握^④。爰采昔贤警语。铭诸座右。以收放心。而资省惕。辑精持门。

西方确指。觉明妙行菩萨曰。大凡修净土人。最忌夹杂。何谓夹杂。即是又讽经^⑤。又持咒。又做会。又好说些没要紧的禅。又要谈些吉凶祸福。见神见鬼的话。却是夹杂也。既夹杂。则心不专一。心不专一。则见佛往生难矣。却不空费了一生的事么^⑥。如今一概莫做。只紧紧持一句阿弥陀佛^⑦。期生极乐。日久

警：①心心照管②力须省察③念佛至要④手持心注神不外散⑤老实念佛⑥一生空过最为可惜⑦一念专精莫别思量

成功。方不错却。偈曰。阿弥陀一句。万法之总持。心与声相依。念兹复在兹。感应不思議。莲开七宝池。又偈曰。少说一句话^①。多念一句佛^②。打得念头死^③。许汝法身活^④。

藕益大师曰。念佛之人。切忌今日张三。明日李四。遇教下人。又思寻章摘句。遇宗门人^⑤。又思参究问答。遇持律人。又思搭衣用钵。此则头头不了。帐帐不清。普济慈航云。凡修净土。除念佛外。惟诵净土真言。超度一切众生。往生西方则可^⑥。余与净土无涉。

又曰。大抵修净业人。行住坐卧。起居饮食。俱宜西向。则机感易成。室中只供一佛^⑦。一炉、一经、一桌、一椅。不得放多余物件。庭中亦扫除洁净。使经行无碍。要使此心一丝不挂。万虑俱忘。空空洞洞。不知有身。不知有世。并不知我今日所作是修行之事^⑧。如是则与道日亲。与世日隔。可以趋向净业。盖汝生时抛撇得干净^⑨。念头上不存些子根节。大限到来。洒洒落落^⑩。不作儿女子顾恋身家子孙之

警：①莫管闲事②心心是佛③只是不动④即得往生⑤是知客行径非真实修行者⑥度生亦是念佛中事⑦先清境界胸中廓然⑧胡思乱想念佛无益须要空洞无物前后际断念佛不知念佛事方可成功⑨生时不挂一念⑩死时不留一念

态。岂不是大丈夫举动。

法光禅师具宗门作用。德清师请益。曰。无奇特。只离心意识^①。参出圣凡路。师往憨山住。一日。粥罢经行。介尔立定。不见身心世界。唯一大光明圆满无边^②。山河大地。影现其中。比觉。觅身心了不可得^③。示众偈云。瞥然一念狂心歇。内外根尘俱洞彻。翻身触破太虚空。万象森罗从起灭。自此湛然度日。一切声色无碍。知见顿空。常以修西方法要示世。

又曰。有问念佛不能一心、当作何方便。菩萨曰。汝但息想定虑^④。徐徐念去。要使声合乎心。心随乎声^⑤。念久自得诸念澄清。心境寂照。证入念佛三昧。然平日必须多念。从千至万。心无间断。则根器最易纯熟。若强之使一。终不一也。

张光纬念佛说曰。经云。执持名号。一心不乱。吾今作一方便。自视此心如净宝瓶^⑥。佛名如谷。逐字逐句。如谷投瓶^⑦。贯珠而下。谷既无尽。瓶亦不满。不放一粒。抛向瓶外^⑧。顾念此瓶。不满径寸。中藏三千大千世界百亿微尘数佛。我亦与之俱会一处。游乐宴息。方是我安身立命处。

警：^①先去六识^②心地空明成光明世界^③身心洞然若一著相便不能矣^④先驱杂思切勿贪快^⑤心口相应历历分明^⑥此喻甚妙^⑦累累贯珠相续不绝^⑧不渗不漏

蓮池大師曰、彌陀經言。若人念佛。臨命終時。必生彼國。又觀經言。念佛之人。生彼國者。蓮分九品。蓋此念佛法門。不論男女僧俗。不論貴賤賢愚。但一心不乱^①。隨其功行大小。九品往生^②。故知世間無一人不可念佛。若人富貴。受用現成。正好念佛。若人貧窮。家小累少。正好念佛^③。若人有子。宗祀得托。正好念佛。若人无子。孤身自由。正好念佛。若人子孝。安受供養。正好念佛。若人子逆。免生恩愛。正好念佛。若人无病。趁身康健。正好念佛。若人有病。切近無常。正好念佛。若人年老。光景無多。正好念佛。若人年少。精神清利。正好念佛。若人處閑。心無事擾。正好念佛。若人處忙。忙里偷閑。正好念佛。若人出家。逍遙物外。正好念佛。若人在家。知是火宅。正好念佛。若人聰明。通曉淨土。正好念佛。若人愚魯。別無所能。正好念佛。若人持律。律是佛制。正好念佛。若人看經。經是佛說。正好念佛。若人參禪。禪是佛心。正

警：①四字緊要②往生自分等級③以下二十種人皆當念佛若謂不暇念不能念者真是無福

好念佛。若人悟道。悟须佛证。正好念佛。普劝世人。火速念佛。九品往生。华开见佛。见佛闻法^①。究竟成佛。始知自心。本来是佛^②。

无名僧者。居湖广黄州。专持阿弥陀佛^③。随所见皆称阿弥陀佛^④。崇禎时。张献忠攻黄州。僧坐城上。夜间高唱阿弥陀佛。军士缚投城下。俄而复上唱佛^⑤。每东城下。西城上。南城下。北城上。始敬礼焉。一日见一鸡。高声唱佛。鸡亦随声而唱^⑥。端午见游船中人。大哭曰。众生以苦为乐^⑦。乃如是耶。弟子钱生恳示修行之要。曰。一心念阿弥陀佛^⑧。

又曰。念佛有默持。有高声持。有金刚持。然高声觉太费力。默念又易昏沉。只是绵绵密密。声在于唇齿之间^⑨。乃为金刚持。又不可执定。或觉费力。则不妨默持。或觉昏沉^⑩。则不妨高声。如今念佛者。只是手打鱼子。随口叫喊。所以不得利益。必须句句出口入耳。声声唤醒自心^⑪。譬如一人浓睡。一人唤云某人。则彼即醒矣。所以念佛。最能摄心^⑫。

空谷大师曰。念佛一门。修行捷径。紧念慢念。

警：^①念佛真圆顿法^②不假方便自得心开^③此心专一^④随其所在常若有见^⑤佛力护念^⑥随感皆应^⑦唤醒梦梦^⑧正法眼藏^⑨勿忘勿助永无间断此法最妙^⑩可定心气可醒睡魔^⑪主人公在否^⑫可收放心

高声低声。总无拘碍。但令身心闲淡。默念不忘^①。静闹闲忙。一而无二。忽然触境遇缘。打著转身一句。始知寂光净土。不离此处^②。阿弥陀佛。不越自心。优昙和尚令人提云念佛者是谁。或云那个是我本性弥陀。谓是摄心念佛。参究念佛。今不必用此法。只用平常念去^③。

又曰。夫学佛者。无论庄严形迹。止贵真实修行^④。在家居士。不必定要缙衣道巾^⑤。带发之人。自可常服念佛。不必定要敲鱼击磬。好静之人。自可寂默念佛^⑥。不必定要成群做会。怕事之人。自可闭门念佛^⑦。不必定要入寺听经。识字之人。自可依教念佛^⑧。千里烧香。不如安坐家堂念佛^⑨。供奉邪师。不如孝顺父母念佛。广交魔友。不如独身清净念佛^⑩。寄库来生。不如现在作福念佛^⑪。许愿保攘。不如悔过自新念佛^⑫。习学外道文书。不如一字不识念佛^⑬。无知妄谈禅理。不如老实持戒念佛^⑭。希求妖鬼灵通。不如正信因果念佛^⑮。以要言之。端心灭恶^⑯。如是念佛。号

警：①不著根尘持守勿失②明心见性成佛宗旨③极妙④此专就在家说⑤四层异于僧众⑥默念西方⑦密修净土⑧读诵大乘⑨五层异于俗家⑩皈依三宝⑪众善奉行⑫诸恶莫作⑬发菩提心⑭修十善业⑮明出世因⑯下品

曰善人。摄心除散^①。如是念佛。号曰贤人。
悟心断惑^②。如是念佛。号曰圣人。

师曰。我出家后。到处参访。时遍融师门庭大振。予至京师叩之。膝行再请。师曰。你可守本分。不要去贪名逐利。不要去攀缘。只要因果分明^③。一心念佛。予受教出。同行者大笑。以这几句话。那个说不出。千里远来。只道有甚高妙处。原来不值半文。予曰。这个正见他好处。我们渴仰企慕。远来到此。他却不说元说妙。凌驾我们。只老老实实。把自家体认过切近精实的工夫^④。丁宁开示。故此是他好处。我至今著实遵守。不曾放失。

又曰。予昔在炼磨场中。时方丈谓众曰。中元日当作盂兰斋。予以为设供也。俄而无供。惟念佛三日而已^⑤。又闻昔有院主为官司所勾摄。堂中第一座集众救护。以为持诵也。亦高声念佛而已^⑥。此二事迥出常情。有大人作略。真可师法。

优昙大师莲宗宝鉴曰。离相念佛三昧无住法门。

慈照宗主云。离相念佛三昧者。上根智人。悟此深理。常运虚空平等心^⑦。无我人众生寿者相。经云。离一切诸相。即名诸佛。由是念念弥陀出世。处处极乐现前。如此者。离相则

警：①中品②上品③出家本分④真实修行惟此而已⑤可见念佛胜于诵经⑥念佛救护现生⑦一切诸相悉皆空寂

无相。无相则无住。无住则入佛境界^①。此乃无上正真大菩萨道。

金刚经云。应如是生清净心。应无所住而生其心。清净体中。空空荡荡^②。晃晃朗朗。一无所有。一切无住。心要诀云^③。冥心本乎无住。无住心体。圆融不测。净名经云。一切法以无住为本^④。安住无为。名之为住。住无方所。故名无住。无住心者。是为真心。

空观念佛三昧无念法门。

空观念佛三昧者。智者大师示三止三观之法。先空。次假。次中。今欲令行者返妄归真。先观一切法是假。乃至四大五蕴六根六尘六识。尽十方世界山河大地。皆无一物。了知虚妄而得会真。修此者。先要摄心静坐^⑤。将世间一切虚妄不实境界。尽情扫荡。具不住著^⑥。唯观于空。并空空亦不可得^⑦。如是顿入如来宝明空海。性觉真空。即如来藏。

瓔珞经云。世人不能成道而脱生死者。良由妄念为轮回种子耳。释教以无念为宗^⑧。若见一切法。心

警：①学道要诀但莫于心上著一物②与虚空等③无所不有④无住是万法宗旨⑤先要静坐方能观空⑥一切放下放下又放下⑦亦无空相⑧谓无邪念非无正念

不染著。是为无念。无念之念^①。乃为正念。圭峰师云。觉诸相空。心自无念^②。念之即觉。觉之即无。修行之妙。惟在於此。古德云。大道教人先止念。念头不住也徒然^③。

参禅念佛三昧究竟法门。

远祖师禅经序云。禅非智无以穷其寂。智非禅无以深其照。禅智者。寂照之谓也。念佛之人。欲参禅见性。但依此法。要于静室正身端坐。扫除缘累。截断情尘^④。外不著境。内不住定。回光一照。内外俱寂^⑤。然后密密举念南无阿弥陀佛三五声。豁然明悟。亲见本性弥陀^⑥。内外身心。一时透脱。尽乾坤大地^⑦。是个西方。万象森罗。无非自己。静无遗照^⑧。动不离寂。得生上品。名实报庄严土。

永明禅师四料简云。有禅无净土。十人九错路。阴境若现前^⑨。瞥尔随他去。无禅有净土。万修万人去^⑩。但得见弥陀。何愁不开悟^⑪。有禅有净土。犹如带角虎^⑫。现在为人师。将来作佛祖。无禅无净土。铁床与铜柱。万劫与千生^⑬。没个人依怙。莲池师云。

警：①一念不生诸妄自灭②无念由于无相③一齐放下④物外寄闲身诸缘任运歇⑤一尘不染⑥是为自性佛⑦心净则土净⑧常寂常照⑨业障所牵⑩捷径稳路⑪先生后悟⑫锦花⑬永无出期

參禪主乎見性。單持乃切往生^①。念佛人見性。正上品上生事。若云經中专言執持名號。曾無參究之說。但欲存此廢彼則不可。蓋念佛人見性。豈患其不生耶。

攝心念佛三昧調息法門。

坐禪三昧經云。菩薩坐禪。不念一切。惟念一佛。即得三昧。初機修習。未免昏散二病。人天寶鑑云。凡修禪定。即入靜室。正身端坐。數出入息。從一至十。從十至百。至千萬。此身兀然。此心寂然。與空虛等^②。不煩禁止。自得明悟。今此攝心念佛。欲得速成三昧。數息最要^③。凡欲坐時。先想己身在圓光中。默觀鼻端^④。想出入息。每一息默念南無阿彌陀佛一聲。方便調息。不緩不急。心息相依。勿令間斷。乃至深入禪定。息念兩忘^⑤。即此身心。與虛空等。久久純熟。心眼开通。三昧忽爾現前。即是唯心淨土。

唐飛錫大師云。世上以水晶。菩提。木槌為數珠多矣。吾則以出入息為念珠焉。稱佛名號。隨之於息。行住坐卧^⑥。常用此珠。縱令昏寐。念佛而寢。覺即續之。必於夢中得見彼佛。夢之不已。三昧成焉。面睹玉毫。親蒙授記。則萬无一失也。

警：①兩者并行不悖②無相無念③亦收心法④清淨心中化為光明照十方界⑤內外圓明遍成虛淨⑥使心不外馳絕妙法門

一相念佛三昧专念法门。

大般若经云。佛告曼殊室利言。菩萨能正修行一相庄严三昧。疾证菩提。修此行者。应离喧杂。不思众相。专心系念于一如来^①。审取名号。善想容仪^②。即为普观三世一切诸佛。即得诸佛一切智慧。天台十疑论云。众生根钝。浊乱者多。若不专心系念一佛。则心散漫。三昧难成。故专令念阿弥陀佛。即是一相三昧。

弥陀疏钞曰。或谓佛佛可念。何不随念一佛。而必念阿弥陀佛。不知彼佛与诸众生偏有因缘故^③。良由彼佛名号。人所乐称。就令恶人。有时不觉失声念佛。人逢喜事。不觉念佛。人逢恶事。及与苦难。不觉念佛。莫或使之而自然者。则专念弥陀。即得三昧。

憨山大师曰。佛为救度娑婆世界诸苦众生。专说西方极乐净土法门。但专念阿弥陀佛^④。发愿往生彼国。有弥陀经一卷。所说都是彼佛国土境界实事。其修行之方。但以念佛为主。每日早起礼佛^⑤。即诵弥陀经一卷。或金刚经一卷。即持数珠。诵阿弥陀名号。或三五千声^⑥。

警：①念一佛即已念一切佛②兼作观想③有四十八愿④佛祖开示法门⑤简要直捷不须余法⑥大忙之极必须十念

或一万声。完即对佛回向、发愿往生彼国^①。此是早功课。晚亦如是。以为定课。每日除二时功课之外。于二六时中。单将一声阿弥陀佛。横在胸中。念念不忘。心心不昧。把一切世事。都不思想。但只将一句佛。作自己命根。咬定牙关。决不放手。乃至饮食起居。行住坐卧。此一声佛。时时现前。若遇顺逆喜怒烦恼境界。心不安时。就将者一声佛。提起一楞。即见烦恼当下消灭^②。以念念烦恼。是生死苦根。今以念佛消烦恼。便可了得生死^③。更无别法。若念佛念到烦恼上作得主。即于睡梦中作得主。若于睡梦中作得主。则于病苦中作得主。若于病苦中作得主。则于临命终时。分明了了^④。便知去处矣。此事不难。只要一念为生死心切^⑤。单单靠定一声佛^⑥。再不别向寻思。久久纯熟。自然得大安乐自在^⑦。得大欢喜受用。

白乐天念佛偈云。余年七十一。不复事吟哦。看经费眼力。作福畏奔波。何以度心眼。一声阿弥陀。

警：①凡一毫之善皆须回向西方②拨转心头急急提念回瞋作喜得大解脱③正智观察求以出世④仍须知愿力极大若愿生净土之心切精勤念佛念至临命终时乘此愿力引导其前念心愈猛即蒙接引⑤寻一归原结束处⑥如子忆父念念固结⑦即得往生

行也阿弥陀。坐也阿弥陀。纵饶忙似箭^①。不废阿弥陀。日暮而途远。吾生已蹉跎^②。旦夕清净心^③。但念阿弥陀。达人应笑我。多却阿弥陀。达又作么生。不达又如何。普劝法界众。同念阿弥陀。

张光纬念佛说曰。石南和尚偈云。念佛切莫贪多念。且念一百心不乱。九十九声心念差。捋转念珠多不算^④。如是一百百至千。从千至万如珠贯。箭射不入刀不侵。百万魔军皆退窄。吾向来念佛。亦只囫囵念过。今始知须字字从心里出^⑤。还字字入心里去。当念佛时。先要闭目端坐^⑥。凝神定虑。不可有杂乱心。躁竞心。昏惰心^⑦。开口出声。务令声从心发^⑧。心藉口传^⑨。息调声和。不徐不疾^⑩。字字分明^⑪。句句相续^⑫。分之则一字可作一句读。贯之则百千句直如一句。绵绵密密。自一声至千万声。自一刻至十二时。无断无续^⑬。不缺不漏。久之纯熟。花开见佛。

吕祖偈云。念佛虔诚便是丹。念珠百八转循环。念成舍利超生死^⑭。念结菩提了圣凡。念意不随流水

管：①忙里偷闲②心急足危已经无及③一心不乱④如此自然用心⑤心不外放⑥八字要诀⑦三心易犯⑧六句念法⑨心口相应⑩纯如⑪嫩如⑫绎如⑬二句工夫⑭念之成

去^①。念心常伴白云闲^②。念开妙窍通灵慧。念偈今留与汝参。

明径山觉浪道盛禅师念佛直指图说。

常寂光

灵迥体即
光脱露如
独根真如
耀尘常佛

一心不乱

五六一佛
蕴根心土
皆非不现
空有乱成

南无阿弥陀佛

是是离念
心心心心
作是无念
佛佛佛佛

师云。佛法之要。莫过参禅。念佛。持咒。修观。持戒。修福也。而念佛三昧。最为尊特^③。盖人只有一心。既此心全提心佛^④。则一切妄念。杂念皆摄归于不乱之正念^⑤。无始来业识种子。悉融化为独露之真心^⑥。正以全提心佛。万法皈依。不假方便。自得顿超。此法门自远公开宗。结社庐山。如十八高贤辈。各有感应。及临终见佛。圣境现前。而得往生者无算。是皆一生取办。不待来世再修。故吾特创立此图。以明马祖即心是佛之宗旨也。

警：①念之心②上句是安定下句是空寂③以果地觉为因地心④念佛念心⑤扫除万缘自成一片⑥当体空净得常寂光

圓信师云。一心不乱者。只以一句佛名。极力追顶。猛之又猛。情识一断。则过去事。思量不来。未来事。卜度不著^①。现在境。心识不挠。三心断绝。谓之前后际断^②。目前如大圆镜中所现森罗万象^③。了无一物可指。荡然身心。如云去来^④。此个光景。名为一心不乱。到此便无心可乱也。现今目前。便是极乐世界^⑤。山光水声^⑥。无非佛法。所以临终时。便无痛苦。

石雨方禅师云。念佛有多种。有渐。有顿。有顿中渐。有渐中顿。所谓渐者。如今人油口念佛。虽不知观相^⑦。不识西方。他后直至善恶业报尽时。这一句油口弥陀。也用得著^⑧。若是顿念的人。直下持名。或一日。或七日^⑨。念得一心不乱。不独死后往生。即现在弥陀全身显现。更有要识念佛是谁的人。随念随叩叩到无可叩处。忽然撞著。此便是顿中渐。若渐中顿者。不管你西方东土。也不管你净念散念。只要一句念得著。便是好手。所谓若人散乱心。

警：①一念不生全体现六根才动被云遮②用当念一句为主截断前后际亦烦杂中念佛之捷径③常寂光④心同太虚一无所有⑤一心清淨境界现前⑥触处皆道⑦此为下等人说心多散乱；⑧观不念弥陀胜⑨此是上等人一心不乱

入於塔庙中。一称南无佛。皆已成佛道^①。

莲池大师曰。予见新学后生。把一句佛。顿在心头。闲思妄想。越觉沸腾。便谓念佛不能摄心。不知万念纷飞之际。正是做工夫时节。旋收旋散。旋散旋收。久后工夫纯熟^②。自然妄念不起。且汝之能觉妄念重者。亏这一句佛耳。如不念佛时。澜翻潮涌。刹那不停。自己岂能觉乎。按此则散乱心念佛。必得久归纯一也可。

兼观门

古德谓众生心杂。观想难成。是以惟劝专持名号。夫观法亦分事理二门。理观之细。如所谓一心三观。元妙精微。诚非初心凡夫所能猝就。其事观工夫。於十六观中。随取一观。时时观想。专注勿移。心境空澄。持诵更为得力^③。平时观想。既熟。临期境乃现前^④。此为骑马拉杖把稳要法。不可不兼修也。辑兼观门。

龙舒净土文曰。斋戒洁已。清心静虑^⑤。面西安坐。闭目默然^⑥。观想阿弥陀佛真金色身。在西方七宝池中。大莲华上坐。其身長丈六。两眉中间向上有白毫一条。八棱中空。右旋转五遭。光明照耀金色面与金色身。次停心注想於

警：①念佛之心不缘过去不缘未来但缘现前一句以为往生正因此万修万人去之法也②由勉强至自然及其成功一也③净土是境观想在境亦在心故能得力④境由心定⑤先摄心⑥次摄目

白毫。更不得妄有分毫他念。当令闭眼开眼。悉皆见之^①。盖欲念念不忘也。如此久久。念心纯熟。自然感应。见佛全身。此法最为上。谓身想佛时^②。此身即是佛^③。又过於口念也。身后必上品上生。唐启芳圆果二人作观想法。只五月。自觉身到净土^④。见佛闻法。

唐启芳圆果二法师於蓝田县悟真寺。一夏结期。念阿弥陀佛。昼夜观念不捨。阅五月。於观想中。觉身临宝池^⑤。见观音势至。坐二大莲华。有千万莲华弥满其间。阿弥陀佛从西来。坐一最大莲华。光明映照。芳果作礼问曰。阎浮提众生。依经念佛。得生此否。佛言。勿疑。定生我国也。又闻释迦世尊。与文殊菩萨赞法华经。其前三道宝阶。其一白衣。其二僧俗相半。其三唯僧也。云皆是念佛人来生此矣。芳果出定。与其徒言如此。

宋遵式往生坐禅观法云。欲修往生观者。当於一处绳床西向坐已。自想所修。合生极乐世界^⑥。便起心生於彼想。於莲华中结跏趺坐。作华合想。作华开想。当华开时。有五百色光来照身想。作眼目开想。见佛菩萨及国土

警：①常目在兹所谓顾湜也②是心作佛是心是佛③身在莲台趺坐④是真非假⑤观法纯熟⑥观己相有六层

想。即於佛前坐听妙法。及闻一切音声。皆说所乐闻法。作此想时。大须坚固^①。令心不散。心想明了。如眼所见。经久乃起。又直想阿弥陀佛丈六金躯^②。坐於华上。专系眉间白毫一相。其毫长一丈五尺。周围五寸。外有八楞。其毫中空。右旋宛转。在眉中间。莹净明彻。显映金颜^③。作此想时。停心注想。坚固勿移。如镜中面象^④。如水中月影。心想寂靜。则能成就念佛三昧。

幽溪大师曰。凡於行住坐卧时。则一心称名。凡於趺坐蒲团时。则心心作观。行倦则趺坐以观佛。坐久则经行以称名。苟於四威仪中。修之无间。往生西方必矣。

憨山大师云。一心持名。固是正行。又必資以观想。更见稳密。其法就念佛时。心中时时默下观想^⑤。想目前生一大莲华^⑥。不拘青黄赤白。状如车轮之大。观想华状分明。仍想自身坐在华中鬚台之上^⑦。端然不动。想佛光明来照其身^⑧。作此想时。不拘行住坐卧。亦

警：①精诚凝结②观佛相有四层③琉璃地上礼金仙④念念不忘常若有见有参前倚衡光景⑤目想神游⑥想莲华⑦想己身⑧想佛相

不计岁月日时。只要观境分明。开眼合眼^①。了了不昧。乃至梦中亦见阿弥陀佛与观音势至同坐花中接引^②。一念之顷。即得往生西方极乐世界。居不退地。永不复来受生死之苦。

明僧性专。十二时唯诵法华。行深禅定。尝於空中见西方宝池。成琉璃色。深广无际。以白妙峰师。妙峰曰。此观行初成之相。不生取著。是善境界。专遂深秘不言。

明唐宜之曰。窃见近年禪律讲之期。所在宣扬。唯净土观门。废缺不讲。夫世间口里诵佛之人不少。而生净土不多者^③。不修观门故。盖往生者。心能往。口不能往也^④。使修观之人。著衣吃饭。常在观中^⑤。或神游莲海。华中礼佛^⑥。或坐矚金容^⑦。光辉四映。或面睹弥陀身满虚空。或静见伴侣。同临德水。净想既成。往生何待^⑧。

宜之名时。专修佛观。过南京长干寺。礼塔念佛次。见塔顶放白光。佛为现相。如黄金色。一日坐禅堂。推窗忽见大海中涌一山。佛坐其上。光明四彻。

警：①咫尺仙源曾不隔②梦中得见皆因观想纯熟③参禅要离想念佛专在想修观门尤为念佛要诀故能易成④神游佛境方能有济⑤要著⑥乐陶陶西方妙境⑦四层观法⑧神至方能形至

墻壁林木。尽空不见。其精诚所感如此。

张次民曰。念佛之法。须兼作观。瞑目向西。端坐默想。神与形离。蓦直西去。渐见树林及诸水鸟^①。金绳界道。欄楯交罗。取次遡行。宝池胜莲香台楼阁^②。种种在目。俨然如来现身丈六^③。观音侍左。势至侍右。放眉间光。垂手接引。我及海众^④。同摄光中。随引而上。礼足悲恳。於时忽见金掌摩顶^⑤。甘露洒身。此心廓然。获大安隐。徐徐神返。若出定然。於彼界中。日游一遍。往生路熟。时至不迷^⑥。愿以此告诸念佛人。须知心念。莫但口念。入此门时。去佛不远。

顾原。号宝幢居士。精修禅观。慈山清公一日至栖霞寺。望见一道者。闲闲如孤鹤。即之其目不瞬^⑦。脱若遗世。已而入殿门。礼舍利塔。瞻拜良久。塔顶忽现五色光^⑧。赭如宝错。清公异之。以语云谷。云谷曰。此宝幢也。作西方观耳。顷之。示微疾。语曰。我坐莲华中半月余^⑨。见弥陀法身。遍虚空世界皆金色。佛视我微笑而拏我。又以袈裟覆我。我决定往生西方矣。

警：①一层②二层③三层④四层⑤五层⑥若不神游佛土如数他人珍宝於己何有⑦心与冥合⑧感应⑨神已到净土矣

阿弥陀经疏钞云。修净土者。若礼佛时。当想己身在莲华中作礼^①。佛在莲华中受我礼敬。若念佛时。当想己身在莲华中结跏趺坐。佛在莲华中接引於我。然后一心持名。昔有二僧作莲华开合想。遂得往生。况复加之一心持名而不往生乎。专主於观想者。少时持名^②。专主於持名者。少时观想。亦随分之意也。

楚石琦禅师。专志净业。室中置一小床。日趺坐默观大莲华出现。其华茎叶。充满法界。有一如来。相好端严。坐其上。眉间白毫放出光明。其光所照。楼台池沼。行树栏楯。众宝间错。水鸟天乐。皆演苦空无我之法。见观音势至。在其左右。清净海众。皆得不退转。从定而起。空空不可得矣。有怀净土诗百韵行世。

断爱门

执持观想之功。未尝无勤勤恳恳者。而於世缘未能割断。爱情牵曳。即妄念纷飞。有所好乐。固为爱。忿懣忧患恐惧。亦由爱而生。心不能正。职是之由。纵平时觑破。而临事难免动心。以致净功无成。良可叹惜。必有坚忍之力。斩断爱绳。时时体察。由强制而至於自然。其庶几乎。辑断爱门。

觉明妙行菩萨曰。有问学人云何得离尘

警：①栖神已在莲华土②二者相兼

欲。得无障碍。菩萨曰。我将由小而推之大。由外而推之内。汝等当善解其义。有人於此。无故而夺汝一文。动瞋恨否。曰。一文虽微。见夺则瞋。又无故而予汝一文。生喜悦否。曰。一文虽微。见予则喜。有答以一文甚微。予何足喜。夺无可瞋者。菩萨曰。汝能如是。心之清静久矣。何至今日尚沈浊垢耶。汝等当知学人见有见无。处处是著。念念皆贪。欲断贪著。先从一钱之予夺。作弃舍想。作非我有观。夺不起瞋。予不起悦。如是乃至百千万钱。乃至亿亿万钱。乃至身肉骨髓。乃至妻子财产。乃至过现未来心意意识^①。乃至生死业报菩提涅槃。一切皆如此一钱之予夺。自然习漏消亡。障缘永灭。渐复清静。成就道品。汝等依此修行。勿更自虞窒碍。又曰。汝等虑身缠世网。念头不得乾净耶。我有一法。汝但发箇远离求度之愿。将牢牢归向极乐世界。见阿弥陀佛之心。换却劳劳奔走名利之心^②。便能脱

誓：^①此法甚妙，从少至多，视多犹少，自然贪瞋俱忘，要知生我之初，一钱不曾带来，我生之后一钱不能带去，何不身心坦荡，寻取本来面目^②声色豪华一笔销

尘劳而即觉路矣。

宋僧法一。宗果。从东都避乱渡江。各携一笠。果笠中有黄金钗。每自检视^①。一伺知之。果起如厕。一亟探钗掷江中。果还亡钗。不敢言而色变。一叱之曰。与汝共学了生死大事^②。乃眷眷此物耶。我适已为汝投之江流矣^③。果展坐具。作礼而行。

幽溪大师净土法语曰。杨次民谓爱不重。不生娑婆。念不一。不生极乐。娑婆有一爱之不轻。则临终为此爱所牵^④。矧多爱乎。极乐有一念之不一。则临终为此念所转^⑤。矧多念乎。所谓爱者。自父母妻子。昆弟朋友。功名富贵。文章诗赋。道术技艺。衣服饮食。屋宇田园。林泉花卉。珍宝玩物。有一物之不忘。爱也。有一念之不遗。爱也。有一爱存於怀。则念不一^⑥。有一念不归於一。则不得生。问轻爱有道乎。曰。轻爱莫要於一念^⑦。问一念有道乎。曰。一念莫要於轻爱。欲轻其爱者。莫若杜其境。众境皆空^⑧。万缘都寂。万缘都寂。一念自成。一念既成。则爱缘俱尽矣。曰。

警：①心有所牵②真良友③与管宁锄金事如何④慧剑一挥心无所恋⑤佛珠双照心无所纷⑥欲出娑婆铲除净尽⑦二而一⑧不见可欲使心不乱

杜境有道乎。曰。杜境者知万法本自不有。有之者情故。情在物在^①。情空物空。万法空而本性现。本性现而情念息^②。是以欲杜其境。莫若体物虚。体物虚。则情自绝^③。情绝则爱不生。而唯心现。念一成。圆觉经云。知幻即离。不作方便。离幻即觉。亦无渐次。功效之速。有如桴鼓矣。

明周廷璋。生於正德嘉靖间。为人淳朴。治家不计。有辄散之贫者^④。人与之语。辄笑^⑤。或谑之。骂辱之。亦笑而已^⑥。晨起必诵金刚。弥陀观音经。各一卷。曰。吾不离日用。不涉贪爱而已^⑦。年八十七将终。谓家人曰。观音谓我绝荤五日可西行。遂日食一蔬一粥。诵经而逝。

憨山大师曰。念佛求生净土。原是要了生死大事。如何得了生死。如何是生死根株。古人云。业不重。不生娑婆。爱不断。不生净土。是知爱乃生死根株^⑧。既不知生死根株。则念佛一边念。生死根只听长。如此念佛。念到临命终时。只见生死爱根现前^⑨。那时方知佛全不得力。悔之迟矣。故劝今念佛人。先要知爱是

警：①太上忘情②以性制情③无情故无爱④修福⑤无相⑥忍辱⑦持戒⑧最堪怜无端爱欲牵⑨爱根障碍

生死根株。而今念佛。念念要断这爱根^①。如眼中见的儿女子孙。家缘财产^②。无一不是爱的。全身在火坑中一般^③。这一声佛。果能断得这爱否。若断不得这爱。如何了得生死。故劝念佛人第一要在生死根株上^④。念念斩断。则念念是了生死之时也。

蒋太史超。记前世为峨嵋僧。数梦到故居庵前濯足。为人骂嗜内典。一意台宗。虽早登禁林。尝有出世之想。假归江南。遂之峨嵋。示疾恒化。自书偈云。傴然猿鹤自来亲。老衲无端堕业尘。妄向镬汤求避热^⑤。那从大海去翻身^⑥。功名傀儡场中物^⑦。妻子骷髅队里人^⑧。只有君亲无报答。生生常自祝能仁。

周克复净土晨钟曰。佛以贪瞋痴为三毒。贪毒在心。而见之於身。则为盗。而五欲。色为最。圆觉经云。一切众生。皆因淫欲而正性命。楞严经云。淫心不除。尘不可出。又云。汝以淫心。求佛妙果。纵得妙悟。皆是淫根。轮转三途。必不能出。此经首借淫室立言。盖直从众生根本无明。首拈立案。然后向道有机。实

警：①一刀斩截②只恐临时被此牵缠③爱河沉溺如何能出④欲出娑婆除必尽⑤如火益热⑥苦海难离⑦官场即戏场⑧活鬼乔相守

是如来顶门针法。

蒋十八者。海盐人。中年与其妻合志修行。断除爱欲^①。一日各炷香唱佛名。并书一颂而逝。蒋颂曰。这个幻身。四大合成。今日分散。各归其根。诸幻既灭。灰飞烟绝^②。如空中风。如碧天月。既无障碍^③。又能皎洁。一切永断。无有言说。四十年来。脱离嗜欲。惟阐大乘。朝诵暮读。今朝撒手西归。自有现成果足。其妻颂曰。看过莲经万八千。平生香火有因缘。西方自是吾归路^④。风月同乘般若船。

又曰。四十二章经云。佛言。慎勿视女人。亦莫共言语^⑤。若与语者^⑥。正心思念^⑦。我为沙门。处於浊世。当如莲华^⑧。不为泥所污。想其老者如母^⑨。长者如姊。少者如妹。稚者如子。生度脱心。息灭恶念。按此经语。实释氏最典则之训。不止沙门宜然也。

祖通禅师。幼入社学读书。因见云水道人。皓首长眉。色若孺子。与先生论养生之术。言及字学。曰。古之造字者。皆识道也。且如寇字从完从女者。言人本来完固。体上不知谨守。而反引贼入寇。自劫家宝者^⑩。莫甚乎女也。故会意缺守加女而为寇。师一闻此语。胆战心寒。凡避色如避蛇虺。遂逃至鹤山剃度。自此

警：①第一要著②世缘永谢③清空光景④净土慈航⑤不见可欲漠不关心⑥言则意通⑦炯然自省⑧清净身⑨当作是想⑩腰间仗剑斩凡夫

心安志定。惟以生死是念。皈依净土。

伤终门

平日积功累行。去爱绝非。本为末后临终作预办之计。若至末后临终之时。忽又畏死徬徨。中情惑乱。岂不大负初心。其时必须竭力把持^①。抛弃一切。正念分明。方有趋向。是功行固在平时。而吃紧尤在末后也。辑伤终门。

善导和尚曰。凡一切人。命终须是不得怕死。常念此生多苦。若得舍此。超生净土。受无量快乐^②。乃是称意之事。如脱敝衣。得换珍服。其於敝衣。谁肯恋著。但遇病时。便念无常。一心待死。叮嘱家人。及看病往来问候之人。凡来我前。不得说眼前闲杂之话^③。亦不得輒言安慰。祝愿康健。此皆虚花无益。若病重将终。亲属亦不得垂泪哭泣^④。叹嗟懊恼。惑乱心神。但当同声念佛^⑤。助其往生。待气尽了多时。然后哀哭未晚^⑥。若识死是归去。能不哀泣。尤为达理。况往生净土。舍苦得乐。慎勿哭泣。使死者心乱也^⑦。予又多见世人平常念佛礼忏。发愿求生西方。及至病来

警：①最要一著②脱离苦海超登佛界何等快活③最易播动神志④似关切而实害事⑤如助行人资粮⑥方尽亲属私情⑦恐非死者乐闻

怕死。都不说著往生之事^①。直待气消命尽。识投冥界。方始十念鸣钟。恰如贼去关门。济何事也。死门事大。须是自家著力始得^②。若一念差错。历劫受苦^③。谁人相代。思之思之。

明戈以安。事云栖为师。事亲孝。好行阴德。晚岁奉佛甚虔。预克归期。家人来视甚悲。以安曰。生必有灭。奚悲为^④。吾方凝神净域。面覩弥陀。若等勿以情爱乱我正念^⑤。遂唱佛而化。又朱元正。日诵法华。将逝。预戒家人。临行勿令妇女来。过二三时乃来^⑥。来亦勿哭。后家属至皆哭。元正复张目摇头。令妇女去。去尽乃瞑。

龙舒净土文曰。或问下品下生者。临终时。地狱形相已现^⑦。能至心十念南无阿弥陀佛。则变地狱形相为莲华。亦生净土。何也。答曰。此佛慈悲至深。威力至大。故能如此。譬如铁石虽重。赖舟船力^⑧。可以渡江^⑨。一针虽轻。不赖舟船。江不可渡。盖人有重罪。仗佛力者。可生净土。罪恶虽轻。不仗佛力。

警：①宜囑其无忘西方②所谓佛须自念也③早自警醒④达人之言⑤临终有此正念便可吉祥而逝⑥达理⑦此专以下等言⑧比喻明晓⑨蕩航普济

亦不得生。又如平生为恶。一日招安。遂为良民^①。仗佛力而消罪恶者。亦复如是。又如虬虱。万死万生。不能一里。若附人身。千里可至^②。仗佛力而生净土者。亦复是如。或云。人平生为恶。杀害众生。苦虐人民。临死念佛。亦得往生。其所杀所苦之众生。怀冤枉之心。何时得解乎。曰生净土得道之后。皆度脱一切冤亲^③。岂不胜冤冤相报。彼此无出期者乎。

唐张善和屠牛为业。临终见牛数十头索命。善和告妻延僧念佛。僧曰。经言。若有众生。作不善业。应堕恶道。至心十念阿弥陀佛者。即得往生阿弥陀佛极乐国土。善和云地狱至^④。急取香炉来。即以左手擎火。右手拈香。向西厉声称佛^⑤。未满十声。遽云。佛来迎也^⑥。已与我宝座。言讫而终。

天如或问曰。一生造恶。临终念佛。带业往生。然则我且做世事。临终念佛可乎。答曰。苦哉苦哉。逆恶凡夫。临终念佛。是夙有善根。故遇善知识而得念佛。此等侥幸。万中无一。群疑论云。有十种人。临终不得念佛。一善友未必相逢。无劝念佛人^⑦。二业苦缠身。

警：①反邪归正②带业受生③佛力超度④业报现前⑤逼迫⑥善境现前⑦十种恶缘在老病之外

不遑念佛。三偏风失语。四狂乱失心。五遭水火。六遇虎狼。七恶友破坏信心。八昏迷致死。九阵亡。十坠高岩。忽然遭著一种。便做手脚不得也。即无此恶缘。好病而死。未免风刀解体。四大分离^①。痛苦逼迫。怕怖悼惶。念佛不得也。即无病而死。世缘未了。扰乱胸怀^②。又兼妻啼子哭。百种煎忧。念佛不得也。即未死以前。忍疼忍苦。叫唤呻吟^③。更或医药祈祷。杂念纷飞。念佛不得也。即未病以前。只是年纪老大^④。衰相现前。困顿龙钟。愁叹忧恼。念佛不得也。即未老以前^⑤。稍或俗务相关。狂心未歇。胡思乱想。业识茫茫。念佛不得也。即或清闲自在。有志修行。稍於世相照不破^⑥。放不下。境界现前。随他颠倒。念佛不得也。你看老病之时。少壮清闲之日。稍有一事挂心。早是念佛不得^⑦。况临终时哉。且世事如梦。那一件替得生死。天堂未开。地狱先成^⑧。生死未明。皆成苦本。眼光落地受苦之时。方知平日所为。尽是枷锁镬汤地

警：①病死苦②非病而死苦③非死而病苦④非病而老苦⑤非老而作业苦⑥又有修行不坚苦⑦除恶缘外有六种不得念佛可知无事念佛即是福⑧可惊可怕

狱。失却人身。万劫难复。铁汉闻之。也应泪落。曾许他临终念佛乎。人生在世。能有几时^①。石火电光。眨眼便过。趁此未老未病之前。抖擞身心。拨弃世事^②。得一日光景。念一日佛名。得一时工夫。修一时净业^③。由他临命终时。好死恶死。我之盘缠预办也。我之前程稳稳当当也^④。若不如此。后悔难追。

王龙舒曰。譬如人入大城中。必先觅安下处。却去干事。抵暮昏黑。则有投宿之地。先觅安下处者。修净土之谓也^⑤。抵暮昏黑者。大限到来时也。有投宿之地者。莲华中生。不落恶趣之谓也^⑥。又云。昼必有夜。必为夜备。暑必有寒。必为寒备^⑦。存必有亡。必为亡备。何为夜备。灯烛床褥^⑧。何谓寒备。衾裘薪炭。何谓亡备。福慧净土。

优昙大师曰。凡修净土之人。每念世间一切无常。成必有坏。生必有死。若不亲闻佛法。则舍身受身。轮转三界。四生六道。无解脱期。我今有缘。得闻正法。得修净业。唯佛是念。舍此报身。当生净土。入彼莲胎。受诸快乐。

警：①浮生如幻②身寄娑婆心归极乐③急急办盘缠恐来不及④乐国不遥归有路⑤生前预备⑥死后快活⑦凡事豫则立人何独不为死备⑧比喻甚明人当猛省

永脱生死^①。不受轮回。此乃大丈夫平生之能事也。才有疾病。正要向前。坦荡身心。莫生疑虑^②。直须西向正坐。专想阿弥陀佛。与观世音大势至菩萨及无数化佛^③。现在其前。一心称念南无阿弥陀佛^④。声声不绝。於诸世间一切事务。不得思念^⑤。不得贪恋。若或心念起来。但要急称佛号。於念念中除灭罪障^⑥。只此一念。决定往生净土。

明袁宗道。子登。年十二。病瘥将终。语宏道曰。死矣。叔父何以救我。宏道曰。汝当念佛。即得往生佛国。此五浊世^⑦。不足恋也。遂合掌称阿弥陀佛。诸眷属同声助之。顷之。微笑云。见一莲华色微红。俄而曰。花渐大。色鲜明无比。俄而曰。佛至矣^⑧。相好光明。充满一室。顷之。气促。宏道曰。汝但称佛字可也。登称佛数声^⑨。合掌而逝。

莲池大师曰。生死有命。则人於病中。当生大解脱。任其死生^⑩。莫起恐怖。又过去如幻。现在如幻。未来如幻。尽情放下。单持正念而已^⑪。又与王大璋曰。贵恙宜将身外事。并此

警：①人生第一乐事莫如出世间法②心中放开一切③凭仗西方作主人④皈依慈尊疾病上药⑤抛撇乾淨⑥称佛为正念杂念自消⑦真达人之言⑧感应道交⑨一字易念一心注定⑩舍去身心无可系恋⑪只守一心

身四肢百骸。尽情放下^①。使空无一若必物。不可歇者。权且歇下。待后处之。妄想炽不能制。当念佛数声压伏之^②。世间荣华富贵。不过片时。厄难苦恼。亦不过片时。且万般皆属前缘。非人力所能为。尽情放下。一心念佛。至嘱^③。

真歇师偈云。访旧论怀实可伤。经年独卧涅槃堂。门无过客窗无纸。炉有寒灰席有霜。病后始知身是苦^④。健时都为别人忙^⑤。老僧自有安闲法^⑥。八苦交煎总不妨。此偈伤身世之浮脆。了梦幻之起灭。指情妄之所缘。示斯道之真寂^⑦。五十六言。网罗殆尽。真人之龟鉴也。

净土晨钟曰。净土资粮。具於平日。不知欲办大事。吃紧尤在临时一著^⑧。从前悠忽。到此延挨不得^⑨。从前迷著。到此糊涂不得^⑩。从前浮华。到此假借不得^⑪。从前歧路。到此徘徊不得^⑫。只方寸灵明用事^⑬。醒则立现莲台。迷则六道三涂有分。秽净顷刻异路。危哉危哉。究竟把握要诀。不外一心正念四字。宋儒谓平

警：①病时良方②金刚杵③把持得定④此身衰老⑤人事纷扰⑥单提佛号度朝昏⑦真心不灭⑧顷刻分途⑨无常来到无可延挨⑩紫镜现前无处闪⑪生前富贵无能倚仗⑫地狱即至无从逃避⑬净散随心圣凡异路

日工夫。正於此处用得著。即是此意。虽然。不豫办於平日。而欲袭取於俄顷。泥恶人十念往生之语。不妨放宽眼下。恐经文所说。亦是如来万不得已垂手之苦言。非便以西方作此輩护身符也^①。且人情莫不好胜而恶劣。独於此事。甘以下下自许。亦殊可悯。

昔正阳帝君。钟离祖师。见人临命终时。神昏气断。不知所往。於一片黑暗中。随风飘忽。望光即投^②。因而沉沦六道。苦无了期。爰著归空真诀。发明六道之光。皆不可投^③。教人於将归去时。回光内照。存神泥丸^④。坚持一念。愿归五岳名山^⑤。自得从心所欲。不受三涂恶趣之苦。又尝征诸往事。每於垂危之际。有因恩怨未酬。萦诸怀抱者。一时眼光落地。神随识往。竟得如念更生^⑥。报复不爽。甚或念瞋毒而为蛇蝎。念正直而为神明。载之感应事迹。不可悉数。盖善气属阳。阳主升。念善者上升天堂^⑦。恶气属阴。阴主降。念恶者下降地狱。要皆从心所造而已。夫人未尝学道。素乏镇定之心。当悬崖撒手。诸难割捨。保无百魔俱集。万念纷飞。黑风巨浪之中。慧舟安在。其能从容暇豫。谋诸方寸乎。自释迦如

警：注①堵截后路②此时光景甚苦无修行者决无好去处③六道生处皆有光④此时关系极紧⑤仙道⑥幻形方谢神识即驰生前恩怨死后酬报⑦以理言之

来。教人执持阿弥陀佛名号^①。慧远。永明。龙舒。云栖。诸公继起。修净土法门。备矣。而其最吃紧示人。则在临终坚持一念。求生极乐^②。即得感佛来迎。西归莲界。是以三世诸佛。咸赞为出世间法中第一捷径。无如世人知此道者甚少。知平日须念佛功德。临终始得正念不迷者更少。不得不大声疾呼^③。愿人人四大分散时。皆得一心不乱。佛力被加。咸登觉岸。

永觉元贤禅师曰。净业之功。虽私於平日。而临终最后一念。最为紧要。盖以生净生秽^④。入圣入凡。唯此一念为之转移也^⑤。每见念佛之人。寻常俱说求生净土。及临命终时。多无正念。或贪生怕死^⑥。恋此皮囊。或目顾妻儿^⑦。难忍分别。或系念家财^⑧。放舍不下。或因境界不顺^⑨。抱恨而终。或因病苦逼迫^⑩。饮痛而去。既失正念。甘从沦坠。我今劝修行人。到此只要谛信经文。坚凝正念。百般放下^⑪。念佛待尽。呜呼。死门事大。顷刻来生^⑫。一念差错。历劫受苦。可不惧哉。

警：①平时无正念断不能取办於临时而临时一念尤为往生要著②此时念头要把握得定③平日心不纯一临时终恐游移④苏长公以临终不着力不能往生⑤临终决定⑥为身⑦为家⑧为财⑨为境苦⑩为病迫⑪坚持正念勇猛西驰⑫危怆语

净土圣贤录载杨媪。年五十餘。得风疾。僵卧呻吟。有旅亭师过其居。其子请入视其母。媪翠颡曰。病甚。师有好方否。师曰。病从身起。身从假合。汝能捨身。病自去矣^①。曰。捨身奈何。师曰。汝但将身心放下。一心西向^②。系念阿弥陀佛。阿弥陀佛能除一切众生之病。但能至诚念佛者。阿弥陀佛自来救汝^③。惟患汝念不切耳。既别去。媪遂持佛名。默观西方。日益恳至。居五月。语其子曰。佛至矣^④。吾当归西。其子请僧十八。共唱佛名。媪起坐。西向而逝。

助行门

既知念佛。凡居心行事。若有一毫与佛相违。漫欲往生。犹北辕而适越也。则助行可不讲哉。助行以戒杀为首^⑤。余昔有同生录之刻。所载戒杀放生名言事实甚详。今惟补其所未备。及一切应修众行。以为助缘。皆不可阙也。辑助行门

王龙舒曰。全持斋戒。又礼佛念佛。读诵大乘经典。解第一义。以此回向。愿生西方。必上品上生。所谓斋者。不食肉。不饮酒。不淫欲。不食五辛。所谓戒者。杀生。偷盗。邪淫。是为身三业。妄言。綺语。两舌。恶口。是为口四业。贪欲。瞋恨。邪见。是为意三业。总为十戒。能持而不犯。是为十善。若犯而不持。是

警：①至言②身是虚寄心即皈依③佛本愿如是④感应⑤独重戒杀

为十恶。全持十戒。乃生天上。持前四戒。加以不饮酒。是为五戒。能持五戒。常不失人身。若修净土者。不在此限也。若全持十戒。加以功德。固上品上生矣。若止持五戒而修净土。亦不失中品上生。或上品下生也。若又不能持五戒。岂可以不戒杀生乎^①。杀为五戒之首。是为大恶。不杀得长寿报。杀则得短命报。若止能持不杀之戒。以修净业。已不在下品生矣。

明袁宏道。字中郎。万历中为稽勋司郎中。谢病归。卒於僧寺。兄宗道。弟中道。皆好禅宗。中道一夕课毕。入定。有二童子导之西行。见宏道曰。已居净土矣。大都乘戒俱急。生品最高。次戒急。生品最稳。若有乘无戒。多为业力所牵^①。流入八部鬼神众去。予所亲见者多矣。弟般若气分颇深。戒定力甚少。夫悟理不能生戒定。狂慧也。归五浊。如不能持戒。有龙树六斋法现存。遵而行之。戒杀尤急^②。未有日启鸾刀。口贪滋味^③。而能生此土者也

又曰。斋僧。供佛。烧香。献花。悬幡。建塔。念佛。礼忏。种种三宝上供奉。以此回向

警：①戒杀为修净业至要②古来高僧多戒律精严③戒中尤重④杀生者宜知之

愿生西方亦可。或为世间种种利益方便善事。如为子而孝。为弟而悌。闺门尽善。宗族相亲。乡党姻亲。恩爱仁厚。以至事君则赤心为国。为官则慈爱斯民。或怜孤恤寡。或济难赈穷。或劝人为善。或止人为恶。一切善事。随力而行。以此回向愿生西方亦可。或为世间一切利益。不拘大小多少。如以一钱与人。一杯与人。亦必起念云。以此善缘。回向愿生西方。常使一念不断。念念在彼^①。必上品生。

大观间。有人遇故父於市。求教一言。父曰。学葛繁。问葛何人。曰。世间人。访知葛为镇江太守。乃往见之。问其何以见重於幽冥如此。曰。予始日行一利人事。其后行二事。又其后行三事。今四十年未尝一日废。问何以利人。葛指坐间脚踏子云。若此物置之不正。则蹙人足。予为正之。亦利人事也。又若人渴。饮以杯水。亦利人事也。唯随事而利之。上自卿相。下至乞丐。皆可以行。唯在乎久而不废耳^②。其人拜而退。葛兼修净业以是回向。后有僧神游净土。见葛在焉。

元优昙大师曰。卵胎湿化。飞走虫鱼。皆未

警：^①些小功德不忘西方其专心可知^②有言无钱作福者终是无善心耳

来诸佛也。贪生怖死。与人无异。何乃陈此肉山。树兹炮烙。穷口腹之欲。极甘美之需。不知断其命者。是出佛身血也。造杀害之深尤。绝慈悲之种性。生前福寿。暗里消磨^①。死后沉沦。酬还不爽。修净业人。当知心佛之心。方能履佛之土。

昔人云。良辰美景。人逢之而色喜^②。物遇之而心悲。人於此时。骨肉团圆。珍羞罗列。物於此时。母子离散。魂魄骇飞。故节日多杀生。最为残忍。试观割一鸡而众鸡皆鸣。屠一猪而群猪不食。念及此。虽嘉肴在御。黯然神伤矣。昔有句云。欲知世上刀兵劫。试听屠门夜半声。最为悲切^③。

又曰。欲趣菩提。慈心为本。凡修净业。济物为先。观夫飞禽走兽。水族游鳞。或树网罗。或拘笼槛。穿腮反翼。系足倒悬。将临汤火之间^④。欲赴刀砧之上。忧悲恐惧。变慑悼惶。望云汉以魂销。忆林泉而胆碎。虽知万死。犹冀一生。顾盼哀鸣。以求救拔。所赖触目垂怜^⑤。抽财赎命。开笼释槛。断缚解悬。施水

警：①欲延生须戒杀②以人体物正是怨道③伤心惨目遭劫者当作如是观④反身思之能不动心⑤怀盘餐时知有冤号否

焚香。合掌咒愿^①。法施事毕。或纵陂池。或放林野。皆由佛道展演悲心。上自人伦。下至蝼蚁。力苟能办。无不放生。因兹胜利。回向西方。普愿众生。同成佛道。

智朗念佛放生说曰。夫欲全仁德。莫若放生。欲出苦轮。无如念佛。今立一放生之法。置一竹筭。每日事务之暇。念佛数声。日贮一文。岁满所积三百六十文矣。斯亦不费多财。不妨多力。何人不可为之。惟贵久远修持。终身不倦。於一载之中。不拘何时。行放生业。计其放处及年月日某甲放生若干。专愿永无疾苦厄难之灾。复增鹤龄松茂之算。再持佛名。誓无改变。而不得往生者。三世诸佛。便为诳语。偶云。放生念佛两重难。只贵当人心地坚。永祖传灯辉不夜。愿提正念摄人天^②。

明莲池大师曰。念佛不可以杀生。念佛以慈悲为本。如不戒杀。功效减少。一切众生。皆有佛性。历劫以来。同为眷属。杀彼养我。情何以堪。奉劝念佛之人。每下箸时。常设此想。自能断荤。早成净业^③。即或不能长斋。能持六斋。亦得往生。若杀生则断乎不可^④。

警：①凡放生先念往生咒②永明禅师以放生得果③惻隐之心於食时发现自能不贪口味④因果不相应

云栖六斋月斋图说。

六斋每月六日。初八。十四。十五。廿三。廿九。三十。如遇月小。廿八廿九可也。

十斋每月十日。初一。初八。十四。十五。十八。廿三。廿四。廿八。廿九。三十。月小为廿七。廿八。廿九日。

月斋每年正五九三个月持斋。不能三月持斋。必须三月戒杀。

净土文说。念佛人如能断肉为上。如不能断。且食三净肉而减省。食若兼味^①。且去其一。如两餐皆肉。且一餐以素。人生禄料有数。如此自可延寿。如早餐食素。其利甚多。一省业缘。二可清净。三不妨善业。四至晚食荤时。不至厌此而欲彼。若以食素为难。宜以食荤之费为素食^②。则易行而可持久。若纵口腹之欲。亦无了期矣。语云。世上欲无刀兵劫。须是众生不食肉。斯言可不畏哉。

警：①见杀闻杀疑为已杀均不食为三净肉②更为贪口味者设法

到寺院探索长寿秘诀

新华社上海分社讯：中国人民解放军八五医院内三科主任陈俊元和他的同事完成了一件很有意思的工作：为寺院里的僧侣做了血指标测定。

这件工作的目的，是想告诫人们，要想长寿最好别吃或少吃荤食。因为吃荤食是导致人的血粘度增高的原因之一。大量医学文献报告表明，冠心病、高血脂病和肺心病患者的血粘度都高。而这些病都是危及人类特别是老龄人生命的祸根。

测定结果表明，僧侣比普通人的血粘度要低。众所周知，僧侣是只吃素不吃荤的。这也正是医生选择僧侣为测试对象的原因。这件工作是一九八四年十月进行的。陈俊元主任率领的五人小组，对上海玉佛寺、龙华寺和苏州寒山寺、灵岩山寺四座佛教寺院共一百名僧侣做了血粘度的测定。随后他们又对这两个地方各一家养老院一百名普通人做了测定。两者对比的数据，经统计学处理后得出的P值前者小于后者0.01。这个P值结果说明两者血粘度存在的差异完全成立。

五人小组从测定的结果中还获得另外一个收获，即人的血粘度的高低与年龄无必然联系，血粘度不是随着年龄的增长而增高。为了证实这一点，以上两组测试对象的年龄都在六十岁以上。他们还对上述两组测试对象做了全面的体格检查，结果是：一百名僧侣中无疾病者有五十七人，另外一百名普通人无疾病者只有八人。患有心血管疾病的，一百名僧侣中只有十八人，一百名普通人中却有六十七人。

五人小组在寺院测试期间目测僧侣的饮食是：主食，大米，副食是豆制品、水面筋、蘑菇、竹笋和多种时令蔬菜。

摘自一九八五年四月廿七日《新民晚报》

千百年來碗里羹
欲知世上刀兵劫
夜半聲 夜半聲
欲消世上刀兵劫

怨深如海恨難平
但聽屠門夜半聲
怨深如海恨難平
莫把眾生肉作羹